


言文齋善本



養盡者南田暉



北注草堂詩詞五卷

附外集三卷

丈亦歲在并

署燁



戊寅長至前數日風雪向晦有歛門而入者則吾師陳
浦雲先生令似伯鴻自越中不遠三千里訪之琦於京
師且出先生遺稿以畀於之琦曰此先人志也嗚呼之
琦從先生遊始於丙辰之秋中間先生客懷客許客洛
又以試事往來南北計之琦侍杖履奉教督歲不過數
月顧先生於門下士獨以之琦爲可語嘗贈以詩扇有
側身親大雅垂涕念先型之句又云異時懷袖出入願
毋忘僕之相期在遠大也循省遺言輒復墮淚先生以
辛酉就醫南歸明年終於會稽花涇里居距伯鴻入都
之歲已十有七稔矣先生於學靡弗通襟抱簡遠有魏

晉間意然恒苦疾朝茂暮尤與饗殮俱爲制舉文又不屑屑於有司之繩尺以是屢困省試卒齋志以歿遺稿無次第稍稍編排釐卷爲八謹校而授之梓哀觀羣製雋雅清峭觸挽如志世自有賞音者矣先生臨歿爲詩一章以寄汴中友人原稿未載併錄於此誰云形色礙空虛歸路飄然雲氣扶已識莊生蝶化易不知橘叟奕終無舊遊洛下看花隔好友天涯把酒孤三十九年塵限滿欲從何處見新吾道光三年仲春之月受業周之琦拜識於成都官署之劍南室



北涇草堂集卷之一

會稽 陳棟



浦雲

文



冠悔堂賦

佩弦生秣馬膏車不知所趨其冠于于其貌瞿瞿得魚忘筌待兔守株目炫耀於涉海足飄搖如凌虛乃築堂於東山之隅而居之心煩慮亂形瘁神癯菊綻金而不採酒泛玉而誰娛土木之形骸不飾盤鈴之傀儡相呼其竭誠悃潔村區而聽命於靈龜乎象旣成挹卜者而告之曰僕幼而好奇冠乃知悔歧羊墨絲莫別當改今

欲煮鶴燒琴揉蘭碎芭擲李氏之龍香裂江家之錦綵
而一豎鬩於中庭五鬼滿於後載奈何卜者卹然而駭
曰殆哉殆哉君之改也夫荆棘塞路騁足者愚履道坦
坦哭途者隘可以守元可以受采且其占曰需泥致寇
敬慎不敗畏懼則已何改之有而君見之鄙猥也鄰有
筮者敬造於堂視其占詞若問若商復決之以周易得
觀之屯曰觀國之光利用賓于王生乃听然而笑曰甚
矣龜筮之相欺也今有人焉欲觀南海謬適豐岐登高
四望渺無津涯指南之車忽得逐電之駿已嘶而乃攬
轡止之曰是不可往將終於斯乎更如筮言則羅浮庾

嶺又似在崑崙懸圃之西甚矣龜筮之相欺也筮者曰
君誤矣君不見九三之變爲節乎卦劫之得爲屯乎佩
長鍊而不衰君所以久迤邐也欲萬國之皆歷君所以
長遷延也策銳志而無繼君所以遭險艱也方登道岸
又耕石田苦節之貞其信然耶悵陽剛之蒙阨當藏器
以待時憤陰柔而欲奮終泣血之連瀉苟天風之不至
鼓鵬翼以何之君誠知今是而昨非畧改絃而易轍無
厚之刃有餘百鍊之鋼不缺行見蒼生望後塵紫綬虛
前席壽著作於名山寶聲稱於拱壁且靈龜亦非教君
復遵前跡也視浮靡而稍擗節之則琴書可以養性蕙

蘭可以紉衣廷珪之丸以耀螭頭采文通之管以增鳳閣輝將和緩之神醫自至而借昌黎之大筆奚爲君但知悔之名而不知悔之實何龜策之相欺也佩弦生黯然而思悠然而解載葺其堂額以冠悔又爲歌曰雷闐闐兮雨濛濛我瞻四方兮何適從何適從兮海中駕萬里兮長風揖金母兮拜木公撫琪樹兮玲瓏醉玉液兮珍珠紅飛瓊爲我笑雙成爲我容相羊相羊兮蓬萊之宮答歌曰遊子歸來兮蘭室玉連環兮金屬戍薜荔幄兮蕙帷刻木蘭兮爲櫛林下兮美人姍姍兮欲出贈之兮瑤瑟君報我兮珊瑚筆丁宣告戒兮曰蓬萊不可卽歸來歸來兮悔鄧林之追日

三江閘賦

越於東南號爲澤國會稽之山衆水所出聚者滹滹流者汨汨或旱而乾或潦而溢蓄洩不時田禾是賊厥田下下莫知所卹迺有有明郡守湯公紹恩始謀建閘康濟兆民其初建也命石工召役人披荆榛驅猴狻斲秦望斷遶門破射的鑿覆盆晝日夜月轟轟喧喧剗峩剗岌負嶺挈吭輦馱舟運纒屬汗奔兀婁頽砒跣積江濱爰度地勢三江之口岡巒闕踈屹嶄峻陡石甬橫波靈擘鼈負怪鼉朝鼓饑鯨夜吼湍瀑朝宗雷風迅走瀦泄

形勢莫出其右結盟山川之神投檄鬼怪之藪築閘於
斯福民不朽闡功伊始水族失利聚族爲灾波濤湧至
漂石碎訇崩岸震悸江豚海豨眩耀變異有隸胥莫龍
贊於公前曰君子愛民成仁小人殺身取義今鉅工星
急怪魅火熾猶豫豫前功永棄龍請就地壓除沴崇
矯首抗袂隕身水次於是鬼雄所懾瀾息波平驪虬遠
遁支祁潛形牛魚斂其翼虎蛟息不鳴太守迺指揮匠
石驅率隸兵規摹矩矱高經下營食指千計動作合程
鑿山霹震下柱雷轟灰土黶隳秫粥縱橫牝牡轆葛平
銳接迎夷若坦道固似雄城屏翳供驅役海若奉使令

天吳奔左右河伯持權衡槽板復南山之木港洞名羅
天之星屹石碑而則水凡六月而功成偉矣哉匯納三
江噴薄大海透透迤迤繚以石隄千餘文崢嶸嶸嶸鎮
以土城百餘雉北矚洪流渺渺瀾瀾舟楫擊撞舳艫千
里南瞻鑑湖紛紜耒耜土田萬頃惟聞是視茅洋蒿口
未足誇玉山匾地安能擬蓋錢清白塔百川之水無不
會流於此焉當夫狂飈忽起愁霖怒傾洪濤泔泔濁浪
滌澗居民怛呼禾黍戕生則命啟閘以疏其行雪山頽
墜白巘縱橫泊然而去一塵不驚若乃蘊隆蟲蟲旱魃
爲虐官祭社壇民停鋤耨桔槔抱甕櫛比繡錯迺命閉

開曠土是攫下兮薨薨椽兮橐橐紆迴渟滢永以不涸
他如斥鹵開場桑麻興利歌功頌德不可勝記故公之
在越如日月之經天江河之行地而祠宇春秋有司襄
事彼莫龍亦得從而祭焉

西施石賦

試望平原憑弔嬋娟四圍越岫萬里吳天僕乃買一葉
之小舟邀同心之幽客泛鑑水之漪漪乘樵風之策策
溯賀監之莊過放翁之宅波融漁鏡花簪岸幘覩一小
邱於河之磧旣幽傑以森秀復紆青而綴碧舟人指點
曰此卽浣紗津西施石好停尋勝舟試著登山屐爰攜

客以升崖窮山坳與林僻平岡寂寂宿莽離離楊花陣
陣蛛網絲絲蘭房兮蕙幄羅衣兮荔帷桃花兮銷沈人
面柳葉兮憔悴蛾眉春秋代序悵誰依兮音容久杳渺
不可思兮繁霜肅肅傅金粉也丹楓開落點臙脂也松
風刺骨銷夏灣也山鬼跳擲采蓮姬也魂歸來兮亦瞻
顧而嗟咨也嗚呼噫嘻惆悵何極昔日烟波江深雲黑
昔日溪澗泥封茆塞昔日蹊徑叢荆老棘燕子歸來可
曾相識客亦顧余相對太息乃謂客曰西子之美怨綠
愁紅西子之嬌飛燕驚鴻石上青苔岸傍桃李咏之於
詩中顰眉含愁捧心增媚貌之於畫工碧玉三層紅心

滿地夢之於館娃之宮而訪其遺踪與廢址第見夫牧
犢與樵童如蜀鏡之置於青山如支機之斷於白虹悲
夫日之夕矣翱翔忘反野鶴歸巢流鶯喚晚乃下長林
乃轉峭坂偕客登舟中懷繾綣命舟子設梨酒一杯桂
茶一瓊呼西子而奠之又問之曰五湖之泛存耶沒耶
扁舟種玉巨浪懷沙王軒之遇是耶非耶薄廟明妃聚
景芳華吳宮之葬真耶幻耶罡風琪草檀點窗紗姑蘇
走鹿苧蘿啼鴉仙乎仙乎其將何以爲家

悲秋賦

有序

余向不知秋之可悲立冬前二日蔚文七終之

期也闕于一弔黯然不寐空林風雨聲徹夜到
枕若相助以悲者率爾成篇情生於文不覺言
之過傷其詞曰

秋風飄飄秋日昭昭蘆花瑟瑟荻葉蕭蕭楊柳旣落梧
桐盡凋鷓鴣啁哳絡緯漂搖僕乃僚然以傷淒其以悲
綠琴懶撫緗帙慵披彳亍茅廬低徊江渚命奚囊兮自
隨書虛空兮無緒渺古人之可追弔形影而誰侶則有
屈原忠悃放逐瀟湘蘿薜醜其面貌蛟龍隱其文章漁
父鼓枻而笑女嬃申詈於旁悲莫悲兮妖芳草日復日
兮降微霜若夫陳后見斥屏處長門望黃昏兮迴輦整

綠鬢兮承恩燈火照兮別院星月冷兮空垣舉聲欲泣
掩袂何言飄風赴閨悲來驚魂又若定遠侯封玉門萬
里身被金夷不顧生死邊月搖弓驚沙沒指別女弟之
淒涼望君門之邈迤悵旅鴈兮南歸尙枕戈於北鄙更
有杜陵遭亂避地東川老兵戈於劍外絕音信於江邊
聽折柳而腸斷聞啼猿而淚懸倚闌干之北斗嘆秦隴
之烽烟又如歐子讀書聞聲淒惻四壁寒蛩一時啾唧
感草木之豐茂忽凋殘於頃刻恨一身之精靈爲百憂
所戕賊四顧無人撫几嘆息下有金人辭漢任氏書桐
蘭叢敗綠蓮粉飄紅汾水年年之雁吳江葉葉之楓有

一於此皆足以消磨壯志摧抑微躬而况乎新歡如夢
舊雨都空坐萬仞愁城之上泛千尋悶海之中者哉兼
葭鬢髻白露無多乃夢美人於山之阿怛然驚寤淒淒
素娥閃孤燈之幢幢鬱浮雲之峩峩心煩寃而不平聲
侘傺而長歌歌曰秋朝來兮鸚鵡洲旅燕暗驚寒螿愁
出門四望天悠悠又歌曰秋暮來兮芙蓉城薄寒中人
在遠行四野沈寥天晶晶亂曰送美人兮江南浦江水
黑兮淚如雨我所思兮誰與語

網詩軒賦 并序

網詩軒者林曉岑貳尹宴息處也初曰心齋曉

岑有詩名四方士來交者皆以詩作縞紵日既
久牆壁几案間無非詩者遂易今名余與毘陵
劉鹿柴莊傲禪新安黃心盦橋李徐梅崖於丙
辰春遊宴其中者凡兩月梅崖既爲之圖鹿柴
作記余乃賦之其辭曰

繫鄴中之茂宰兮有芳聲之夙彰值軍府之需才兮遠
弭節於大梁書檄紛而好暇兮恒六義之是商詠嚶鳴
於周雅兮願相賡而不忘爰迺度州橋而迤北對樊樓
而徑西傍室居之右个拓齋心之故基增綺䟽之窈窕
飾卉木之參差置廣筵而集友顏門額以網詩溯魏風

之婉大兮盛伐檀之君子羈客悲而懷鄉兮鄒枚振其
華綺登吹臺而浩歌兮才今昔而輩起苟三筆之意乎
兮孰濶步而高視爾其春秋佳日風和露溥裙屐盈庭
才俊溢軒酒醇如醴花麗於仙好鳥鳴於簷際嫩涼生
於座間客飲狂而欲舞見侍史之進箋忽仰天而再咳
落滿紙之雲烟令嚴鼓絕擲筆鏗然則以景物爲網焉
若迺江鏡燭月獄劍耀雲掘戈廢壘拾瓦頽垣世荒遠
而難考欵剝蝕而莫分欣聚朋於西閣並傳題於東鄰
羽聲激兮哀念深撫故物兮懷古人莫不筆花怒發思
泉駭奔氣千番而轉厲韻百疊而彌新則以金石爲網

焉其或結伴芳郊歸途鳥喚賓倦欲息主情未散茲境
何佳此遊誰徧孰遇僧於松下疇折花於巖畔旣奇境
之畢搜必清思之競獻轄投井而難駕馬失轡而空健
羣背手而繞庭常燒燈而達旦則又以登臨爲網焉他
若書至七閩伴來三楚或贈瓊瑤或投圭組開篋兮淚
沾步簷兮意沮念渭樹與江雲屢自鳴其別苦今歡娛
之景光豈能期其久佇是以有客必詩有詩必貯雖戲
筆與放言亦旁搜而冥取他日望絕河梁魂銷南浦庶
一室之臥遊不異故人之晤語豈僅誇英俊之畢羅而
以充棟爲豪舉哉僕東鄙幽介結習苦多聞嘯詠而色

喜見喁于而興賒幸斯軒之廣啟忘四聲之屢訛譬游
魚之仰沫難自匿於清波落落高崧悠悠大河傾樽抱
膝作網詩之歌歌曰網朝張兮清漳旁仲宣憤激公幹
狂珊枝寸寸皆精光又歌曰網夕張兮洞庭中左挈杜
陵右孟公赤鯉跳擲生天風亂日有所思兮遵前渚舊
雨不來兮今雨去網兮網兮奈何許

陸商玉蕉鹿夢傳奇序

夢空也非想非因非緣傳巖之夢緣生於因豎牛之夢
因生於緣南柯邯鄲直想耳均非夢也莊子之言夢也
曰莊周夢爲蝴蝶栩栩然蝴蝶不知周也俄而覺則蘧

蘧然周也以夢爲夢亦非夢也蕉鹿其古今第一夢乎
陸子曰夢也者佛氏之不二法門也鄭人無鹿而有鹿
得色之機得鹿而復失鹿得空之機旁人用言而取鹿
空中之色其妻謂夢認人鹿色中之空君相又從而紛
更之一聲棒喝三日耳聾陸子其殆善言夢乎又以其
言譜之傳奇成四十二齣鄭人得夢旁人爭夢室人解
夢士師與君相分夢描頭畫角厯厯如生鈞天廣樂不
足爲其音也八翼上天不足爲其態也壓天鹽腦不足
爲其潦倒坎坷也紅綾櫻桃不足爲其豐亨悅豫也境
本實也實者虛之情本虛也虛者實之陸子眞善言夢

矣然則余之序夢非夢耶曰否余亦夢中人也西施數
齣便是夢中公案但幻境空花中覓不得好因緣亦是
大殺風景事若使飛瓊侍前弄玉列後左巫女而右洛
妃打翻白鳳擲去花筆與青蓮香山輩抵掌一堂則褰
裳就之矣陸子笑曰諾請命趾離招之

何瑩菴傳

嘉慶丙辰之春白蓮教倡亂於楚其明年三月由應山
犯汝寧焚掠村堡於是諸暨何君瑩菴以罵賊死瑩菴
諱春禮少讀書不得志旣壯棄所業遊四方居大梁凡
二載最後乃爲大勝關巡檢某延請以去教匪之至大

勝也巡檢適他出瑩菴在署卒聞變謀集衆堵禦賊已排闥入詢知爲幕賓且南人則大喜更護持之約令司軍中筆劄瑩菴怒罵曰狗賊吾腕可斷豈爲若用哉賊誘以金不動迫以刃不動其衆遂欲驅之去瑩菴植立益大罵賊怒攢槍刺之氣息僅屬猶背裂髮上衝以至於死賊旣去知其事者欲以之上聞爲衆議所格乃各以金卹其子俾扶柩歸諸暨歲癸丑余授經大梁高氏瑩菴居僅隔巷又數與余內兄高息軒往還因得相識然余病不克竟交大梁爲河南省會凡四方士之遊此者率皆峩冠博帶應酬諸貴顯者以博聲譽瑩菴獨落

落無所詣又辨有口遇不平能以言語凌折人人多嫉之遊數困然終不以易其操息軒應童子試時與之同肄業戢山書院知其平日取與不苟文循謹有規矩不肯隨風氣轉移余與接談凡十餘次觀其人聆其言竊意此不過能以孤峭行其志者初不料臨危乃能見義明確如此今功令凡授命行陣者卒旅皆有卹其他無聞焉瑩菴一布衣耳計教匪起事以至於今春若荆若宜若鄖若襄江南北其布衣被執而不屈遇害者當不僅一瑩菴率閭汶不彰瑩菴豈以此求身後名哉且蠢動之輩其勢如魚游釜中不待智者而後知使瑩菴而

爲身謀則不妨姑隨之徐察其動靜虛實以爲勦師內
應否則仗平日口辨見其渠魁諭以 朝廷恩信及義
旅之如霆如雷俾畏威懷德而泥首歸誠豈非不世出
之功哉而瑩菴義有不爲嗚呼惟有以知其不可是以
有所不爲也

書何涵川海天僧夢圖後

不特電光石火有見皆眞卽看野鹿隍蕉何聞非實而
古冊紛紛名流籍籍靡不謂芸生瘁體二氏觀空歷數
幻情終歸夢境信斯言也宜乎夜氣竟同振鐸睡鄉無
礙放參矣何子涵川妙悉是義因空得色命繪成圖地

則僻澳窮洋景則崩濤駭浪此身如寄姑穩寢於茫茫
蜃氣之中其夢乍成又遠附於灼灼金容之列僕也十
年參學隨處證禪偶探奧旨卷端頓破積疑胸次昔盧
生之超凡淳于之悟道各具癡情並徵異夢然而五十
年綸閣二十載粉侯錦繡充其下陳珠玉實於內庫衣
紫腰金者希旨順意粉白黛綠者爭妍取憐在旁觀縱
傲之以刹那而當局亦旣歷夫壯耄迨夫福過灾生鐘
鳴漏盡墓門夜雨方長松楸皇路僉壬正嚴虎豹乃復
一朝大覺彈指遐昇人爵告終天班永列儻曰雲梯若
是則大僚縱欲便爲入聖之基將謂寶筏在茲則元老

招魂卽是登仙之路自古迄今恐無此福若我涵川高
情霞舉異想天開以泡影空花盡物變借毘盧杖錫作
神游雖色相不卽盡空意見未能終泯卽此一端類推
萬緒視彼邯鄲道上功名大槐國中恩禮直將鄙其貪
嗔欲惡寤寐不忘矣且吾輩之涉世也踪跡不可常跡
弛難自主脫毛生之穎亦過朱門吹伍相之簫屢遊下
市翻雲覆雨酬應日在蜃樓倒衣顛裳作息久慚僧夢
君如豎拂相問曰排空馭氣之際見故吾是何故吾僕
則披圖而笑曰鯨吞鼉咋之時得如意乃真如意

青墅詩集題辭

有如新篁解籜有如古木臥沙有如片帆斜挂曳千里
之晴波有如絕澗孤尋駭三更之棲鶻此青墅明府近
年之詩格乎明府才本瑰奇學尤淹貫圍花作縣飲泌
樂飢一時爭重敦詩說禮之風其間亦有射鱷斬蛟之
舉甲冑擐於郊外桑麻衛其境中顧事則甚繁而詩乃
益富戰場句覓爭思繡以弓衣葑屋箋裁允合譜之幽
籥太白之歌梁父次山之賦春陵智畧具徵諷規備有
可以代章奏可以紀輿圖夫揚子技薄雕蟲陳王功思
銘鼎亦以管絃所播大半風月自私耳若體雖取乎兩
漢三唐義不殊乎鹿鳴四牡豈不所見更大所託尤尊

僕近與明府瀹茗談心挑燈論史固知稱詩不足以究其蘊茲刻亦不足以盡其詩然而學問見焉性情出焉客園秋早高齋酒停黃河濤聲乍來枕畔太行山翠半落襟前斯時一卷親攜踈窗獨倚慨然想見箐深林密冒鋒刃以馳驅荼苦薺甘進髦童而慰藉彼區區揣摩聲病刻畫青紅者又豈能絜其短長測其深淺哉今明府鳧舄初迴鶴庭重啟事比寇恂之借潁人同郭伋之涖并屬有微忱擬登末簡獻諸丹陛願無求詭遇於翰軒還我使君須徧答歡迎之竹馬

謝友人惠洞簫笙啟

鳳臺夜暖見彩鳳之雙飛鸞闕風回聽紫鸞之逸響香燈悵望涼月遙聞細雨低徊小樓半徹喜頒二妙兼擅元音清濁咸和管簧妙製紫佩鳴石絃夏樂府稱珍汶陽篠曲沃匏歌場擅美雲璈共按恍參鸞鶴之班趙瑟交彈疑與苹蒿之宴悵玉人之不見明月橋邊驚織指之偏寒春光梅下豈止姑蘇市畔伍相高歌承露盤前雙成小嫫君言秋泛鳴鳴吹赤壁之風我欲仙遊冉冉弄緱山之頂

答黃心菴書

仲冬中澣手泐一函并小詩五首寄至曉岑明府處續

聞文旌已先期東發未識此信有人轉呈尊覽否餞臘
日得所惠書勤勤懇懇若不勝契濶之感者僕客豫十
年襟太行之晴嵐躡大河之秋浪所見名下士不下一
二十人而心所畏憚者惟足下故自紵衣之旣獻鷄鳴
之懷詩增十百郵筒之致月必二三揆鄙人之初意未
始不欲借王裴攻難附韓孟雲龍午冬以後留滯大梁
十有六月足下亦依曉岑以居梧院移琴雨街卓笠遂
得懷暢彼我學識指歸而顧終不能及足下者則病與
鈍各責其半今足下乃愈別愈遠矣淮水湯湯黃樓矗
矗廣君遊屐失我南車欲再求十有六月之挑棋薄怒

邀笛坐愁其可得耶賤疴乍重乍輕無殞命之憂有終
身之累索居無聊結習難破五六月間儻法開之湯劑
有效臺卿之痼疾暫起尙當繭足星郵燒燭棘院敝鄉
人南轅多取道潁毫疲驢逐伴熟路是遵楚州咫尺恐
不復能相過耳曾賓谷轉運方以駢體文古今體詩壇
坵東南淮揚錯犬牙之壤蘭蕙有空谷之香雖吾輩不
屑以五七言爲羔雁而竹裏行廚江干車馬嚴大夫之
高風今人豈遽不相及哉春氣方暄眠食幸自愛

平窮鬼露布

臣聞伯夷不薇蕨當未必名遜微箕顏子不簞瓢亦足

以學超會閔故衛有北風之臣則詩悼之楚以藍縷爲俗則史擯之况復幻形竦肩縮頸甘心麥飯牛衣以冷落我邛園顛倒我韋布者乎伏維玉皇上帝陛下深仁廣被厚澤無疆拯下民於六極之威錫斯世以三登之慶至夫文雅尤所矜憐燃藜而助校書雨粟以酬作字載在往冊傳爲美談詎有有窮氏者系託高陽雄爲鬼伯巧借貌言視聽思之用私立智學文命交之名衣敝食糜死猶不悔幸灾樂禍跡幾難窺畏紈袴若虎狼視縹緇如魚肉蓬頭厯齒偃僕入孺仲之家納屨捉襟慘淡向原思之室或引雷以碎碑石或召風以捲屋茆或

捫鐘以悞王播之餐或驅塵以汚范丹之甌或紅勒親懸使文章減色或黑貂暗損使骨肉分顏流毒已徧四方稔惡將及百世而彼猶復縱談介節高附清流以溝壑爲成全志士之區以藜藿爲磨煉儒生之境伯鸞賃廡居然信以爲真翁子負薪幾至迷而不悟此人心之同疾卽王政所莫容臣受命繩樞濟師涸轍細思藝苑之所由坎輓與夫窮寇之得以蔓延始知吾黨中亦有看錢之奴摸金之尉陽若與窮爲敵陰乃惟賊是鄰强者羊狼而狼貪弱者蠅營而狗苟窮雖無賴此尙不爲以故彼得逞其雄我反無以塞其口臣法先尊貴義切

創懲遂收壘斷之流顯正苞苴之罰軍威旣振士氣益
張百里奚烹伏雌以犒師杜少陵奮長鑣以効命袁安
起臥願乘雪以驅鶩鵝阮籍止悲請問途以窺子午有
窮氏目驚文燄心疾金聲自恃所值之人從無相拒之
術欣呼朋類來決雌雄面鳩形鵠之徒數踰十萬捫蝨
懸鶉之輩陣列三重臣迺倚禮義之干城擐詩書之甲
冑淬鋒鄴架接戰曹倉引鄰壁之火以焚其巢塹學海
之波以灌其壘妖氛辟易六丁則力可驅雷陰沴消除
二酉則光堪射斗當其乍合已自難支旣而陶泐毛穎
之儔脈望鞠通之侶各從間道力搗中堅五鬼技窮遂

分途而潛遁三餘意暢可抱膝而長吟此誠千載之一
時豈敢緩師而怠寇當卽遣明州刺史薛燭率裨將王
通孟達追躡智窮推心置腹民物不自匿其情卽始見
終鬼神無能炫其變又遣祕書監檢校侍中朱博率裨
將王勤向敏中追躡學窮奪談經之席功比於拔幟麾
弧聚問字之車享隆於累廂列鼎又遣冠軍大將軍顏
師古率裨將弦高温大雅追躡文窮險搜月窟千金懸
秦市之書奇抉雲根一賦貴洛陽之紙又遣達州都督
樂安縣開國男聶夷中率裨將王順寶常追躡命窮誠
以格帝揮戈遂駐夫羲娥信可涉川破浪不勞夫帆槳

又遣膠州衛指揮樂彥輔率裨將宋義石守信追躡交窮素車白馬感孚不隔於死生流水高山契合獨深於心膺五鬼等進不能戰退無所依聚族相謀詣營請罪且言其部落若磨蝎若谷風若菽麥不分若烏焉莫辨尙猶竄身下里貽毒凡民臣以囂塵之地非玉帶生所能見長市井之徒恐黑頭公差與共事於是遠招赤仄密檄朱提插標以識道途塗蚨以廣偵伺涉水者困之以寶筏登陸者厄之以金車枵腹者藥以五侯之鯖裸體者束以七襄之錦加以工勤斤削農利耒耨似羅網之畢張遂大小之悉馘郊原重秀村落一清臣俟繕修

學圃之餘封殖硯田之後卽當囚茲五鬼獻諸九天儻念其翰墨曾親刑誅未忍請投畀於綺羅隊裏或編管於歌舞筵前彼非性所便安必且身如桎梏旣足示荒裔遠投之典亦大昭神武不殺之心現在地闢鄰媿星輝奎壁酸餽之氣變而踈狂餽飭之風進爲騷雅後車前席士無不泰之身名東閣西窗友鮮難通之聲氣謹遣玉虛觀提舉兼文州宣慰使聞喜公周賀奉露布以聞其所獲敗絮垢囊別錄申上

劍南室校刻

北涇草堂集卷之二

會稽 陳棟 浦雲

雜著

浮屠銘

長葛縣禪靜寺雍正時土人掘地得北魏敬使君建刹
碑字畫古勁超軼唐人文作駢體惜不著撰寫人姓名
邑令阮景咸昇致陘山書院作亭蓋之載其文邑志亭
旁嵌一姚璟書浮屠銘係唐中宗時勒石撰人趙覲建
人馮善廓寫作雖不及敬碑然古器也錄之可備參考
夫以陰魄陽魂如風似燭歎浮泡之易盡□□□之難

□預啟津梁不憂生滅高託蓮花之上遙歸禁苑之中
美矣哉不可得而言也况以鷄鳴舊系郎署遙基門德
早通時英不絕曾祖諱忠祖諱推父瓊林玉葉俱抽拂
漢之陰驥子龍文並蹠追風之影父諱敬夫人沈氏或
碎珠驪領貽□將來或斷織蛟梭遐□故事既侵蒲柳
早歸松柏孤子善廓等哀練露蓼痛軫風林追念二親
願崇三寶所冀先靈納祐遊定水之津梁後嗣承恩入
慈門之戶牖以大周萬歲通而二季歲次景申肆⑤景
演朔拾肆⑥己卯遂造浮屠一所石像五區爾其圓石
疊重雜烟雲之氣色紫金圓滿含⑦⑧之光輝對喬木

之隱而卽爲龍樹俯通波之括壑聊當猴池雖則事畢
功成尙恐山移海變須垂不朽敢作銘云前代後代非
一代兮前身後身非一身兮精進禮拜得超界兮歸依
念因能出塵兮迴向功德生淨域心緒清勤離苦津長
遊滿⑨之壑永挹飛而之人石長濶各二尺許中作一
圭門門右闔左半開如釋家所塑鬼門關未知何義

綻字

古艷歌行賴得賢主人覽取爲我組組卽古綻字言爲
客縫衣也劉文房詩手綻寒衣入舊山正用此義西河
謂綻何用手改作手紉殊昧綻字之解且紉字惟集韻

有居覲切解作合絲爲繩其餘如內則紉箴請補綴楚辭紉秋蘭以爲佩皆讀平聲西河博極羣書乃亦有此失耶

息媯

左氏傳息媯事云蔡哀侯爲莘故至以息媯歸是敘滅息已畢生堵敖及成王焉乃爲息媯透敘一筆下文未言楚子問之又另提爲入蔡立案未言猶云當未言時後人好奇乃曰生成王後尙未交言天下豈有爲人連生二子相對默默且此三年中楚子何竟不一問卽問而不答三年後何以忽答區區數語亦不值遲至三年

於此歎妾是庶人不樂宋王爲難得矣余有詩曰息媯天下艷智計亦莫逾一朝謝弱國去作章臺姝翟弗尙依然象服還耀軀屈指較新舊勢更天地殊一言兩傾愛爛熳生二雛豈不醜失身富貴聊自娛入蔡非報息抱慚媚新夫振萬不當璧私愛徒區區

打馬

打馬戲不知起於何時李易安有賦余少時得明沈潤卿圖式一卷因撮其大概譜入香閨行樂詞按圖式馬行九十一路每九步爲一窩一馬入窩他人萬馬不能飛越初下馬爲赤岸驛次隴西監玉門關汧陽監沙苑

監函谷關天濮寺大駟監騏驎院飛龍苑尙乘局共十
一窩函谷先登者非疊十馬不過過後仍散行後繼者
少不得踰多飛龍非足二十馬不行飛龍下三三路曰
夾下八路曰塹入夾非夾采不進落塹非得諸賞采真
傍本采真傍撞采及上次人得罰采不飛過塹則尙乘
局矣凡打馬在隴西監內不打少遇衆不打入窩不打
落塹不打遇疊馬遇入窩許倒行倒行亦可打馬凡采
色馬數卽視路數賞采十一碧油行六路桃花重五五
路堂印八路雁行兒四路拍板兒四路滿盆星四路黑
十七馬軍鞞植銀十掇十俱二路罰采二小浮圖小娘

子下次人行二路賞采重擲罰采隔擲散采四十三行
一路俱可作本采真傍本采視賞采真三路傍二路撞
人真傍本采視罰采承撞者行飛塹亦同下馬數二十
馬俱在飛龍苑必得六渾花真本采方許全隊移動近
見王漁洋宣和打馬圖詩惠定宇金林始兩註家俱未
引此蓋此戲失傳久矣

石異

去越城二十里而近日西陳有山焉拏攫蜿蜒石坡努
出畝許舟行其下輒惴惴恐傾壓卯辰之間築海壺塘
浙撫檄屬邑凡山產石者皆開採甲辰二月十二日天

氣爽澈羣工丁丁方施斧斤聞有疾呼於山頂謂是大匠磨赴之甫上坡暴崩入水而山頂故無呼者村人聚觀嘖嘖歎異次日石忽不見隔岸謝氏田平地突起七八丈長濶各十餘步所蒔菽麥不損一株村人以長錐探其底盡數丈終不見石所在至今如小阜云

張譙明

高達夫五十能詩騷壇傳爲佳話古今人事跡有相同者浚儀張文光字譙明前明進士 國朝以縣令內擢給諫初未嘗爲詩也及明季避兵始稍稍涉筆年已近服官矣晚歲與丁飛濤施尙白嚴顥亭諸人稱詩都下

摩旗登壘卓然成家遺集爲後人所刻頗多零落然卽百餘十首中從無一字落元和以下愚山評謂選材漢魏託質少陵洵非溢美今浚儀多有未知譙明爲詩人者余從高翁蘊三處乞得斗齋詩選一本實之行篋譙明有媳馬士琪韞雪氏亦善吟咏著燼餘草五卷

蔚文遺詩

蔚文詩出入元白温李之間矜麗中往往有骨臨歿時以遺集屬余校正余因識力未足留待異日不意丙午三月竟爲祝融氏攫去九京之下負我良友今追憶能成誦者數章附載左簡無題三十首其五春去春來事

總非洞房侵曉敞雙扉
飭簫夢裏偷吹雨
花粉簾前亂撲衣
蔽膝繡殘鴛半化
搔頭玉冷燕初飛
憑誰畫出湖州卷
一寄多情杜紫微
其十節物驚心淚滿腮
隔牆誰報石榴開
齒從齟後難成笑
腸爲迴多轉欲胎
六曲屏風香自掩
二分明月笛偏哀
不知占盡花前喜
留得斑騅幾度來
其十一明識陽臺境
未真真情旣幻幻
堪親石因藏帳容
能肖酒若稱灰
畫亦神晷刻何常
昏復日風光無定夏
還春巫雲儻許隨
心便豈上高樓望
遠人其二十二九華
帳外縷金箱羅綺
開時鏡眩光別後
久無青鳥便歸來
猶及碧蓮芳星河
向晚看牛女玉厯
逢

期數角張恨極不教
眉黛斂儂家夫婿
在長楊雉臯故妓
行曰西湖三月人
如蟻油壁青驄香
覆地妙妓傳聞出
雉臯酒中抱得秦
箏至雲鬢髮髻掠
雙鴉玉貌曾從
太守誇彈罷新聲
訴遺事坐令艷曲
變哀笳憶昔雉臯
初領郡葑岸石函
都不問桃蘂方看
露井嬌柳枝祇愛
章臺嫩繡幕珠簾
散碧烟黃梁日日
大遊仙南統北毳
休論數海錯山珍
不計錢三春畫舫
蘇隄集曲調湖風
聲錯雜簿領趨趨
欲見難當筵惟許
歌童入積善坊邊
甲第開月明官舍
祇空階紅燈十院
佳人待夜半傳呼
太守來複道迴廊
經數里光華照眼
多文綺直將東海

致鵷鸞何必西京誇趙李爾時兩浙大中丞華胄遙遙
亦始與屬吏一朝成假子冰山百丈勢峻嶒儂在王家
稱領隊奉諭更深送珠翠同行姊妹多被留博得蓬池
三日醉中丞富貴實非常署內新添綠野堂賈相從人
能犬吠李波遊騎愛戎裝七十諸侯心自凜狎情上下
交孚甚民間已用賣兒錢幕府猶催鋪地錦國典煌煌
不可逃 聖王弼教重秋曹檻車晝逮中丞入浙水淒
涼送節旄太守間關還對簿罪名擢髮難重數游魂相
對泣剛鋒白骨阿誰埋淺土傳來凶信滿江東皓齒蛾
眉散若蓬蠟淚滿階苔半掩襪羅經雨草初叢郎君試

聽尊前曲此曲當年新演熟進奉中丞博笑顏纏頭屢
致珠千斛滴粉搓酥在眼前重來遼鶴恍千年君遊君
賞君偏雅儂舞儂歌儂自憐阿儂淪落何足惜話到舊
情衫欲濕君不見雉臯太守逞豪奢男作人奴女爲妾
又有卽席贈余詩曰漁陽狂客愛岑牟白眼逢人笑未
休富貴祇應吾自有文章儘許世相求雪消柳岸春調
馬月滿荷塘夜放舟歲住西湖三百日性情那不擅風
流弱不勝衣冠尙遲聲名遍噪倩誰辭六朝金粉香爲
骨三島鴛鸞玉作肌鄰女隔簾窺雅韻歌郎持板待新
詞獨餘一事君輸我破病頻添酒半卮余雖愧不敢當

詩實雋永可誦也

南渟先生詩

密縣錢先生名九韶以詩名豫中人競傳其烟影水中
雁字書中乾蝴蝶諸作余把其全集五言如寄陳載詵
岳色沈秋雨江聲入暮雲登繁塔河聲天外落岳色雨
中深山居樓臺懸樹杪烟火起雲根晚步孤村春落日
野水養閒雲除夕雪滯還鄉雁風驕借樹鴉遊城南僧
舍寒山銜日紫老樹飽霜紅梁園雜感霜侵花影瘦風
落鴈聲寒送別趙衡齋寒鴉城外樹遠鴈嶺頭雲對月
半牀秋樹影一枕晚鐘聲七言如廣武山雲屯敖壁羣

鳥集霜斷鴻溝老樹殘贈范九一遷居草閣遙分千樹
雨蘆簾橫卷一溪雲崇福宮早酌樵路斜通雲外寺人
烟亂點嶺頭村登少林寺鐘樓二室烟嵐歸畫棟諸天
風雨近雕棱登甘露寺塔一紙金城藩上國三條玉帶
鎖雄關對酒一林楓葉寒山寺兩岸蘆花淺水船不寐
風在不堪聞處響月從無可望中圓簡貴老成似比詠
物各詩高出數格丁鏡山侍御主講大梁最愛作者蘆
花詩至呼爲錢蘆花今併載於此江鄉叢薄戀依依底
事天涯處處飛短草灣頭隨葉落斜陽渡口趁帆歸擬
將桃梗無根蒂認作楊花有是非淺水船中人未覺醒

來雪片滿蓑衣懶漫無情淡不妨豈同柳絮肆顛狂侵
來衣袂從添冷點上頭顱恐是霜接岸平沙秋月濶背
城野水晚雲荒飄零自分江湖老且狎輕鷗泛夕陽漠
漠輕揚白鷺洲江天無此不成秋飛來似雪花難辨化
去爲雲影尙留乍捲驚飈迷古渡偶隨明月上虛舟相
看羨爾無牽罣浩渺烟波自在游清笳未聽已沾襟况
觸飛花亂客心隱約平灘無近遠淒迷落日半晴陰吹
殘弱絮舟中笛搗碎寒雲岸上砧天地無情都不管祇
憑風信卜升沈

僧夢綠

維揚詩牛腰束矣近得僧夢綠一律梅岡東北竹西南
夢裏樊川酒半酣一笛晚風橋廿四幾灣春水月初三
地臨花市簾陰重城逼烟巒鳥性憨記不分明何限事
暮雲回首鬢鬢格雖不高讀之殊令人作紅橋遊冶
想夢綠姓宋氏名石銘合肥諸生晚逃禪於汴之相國
寺工書及水墨蘭竹人飲以酒輒醉醉則潑墨滿紙風
條烟葉往往雜出銀鈎鐵畫間古風不及格五七律能
自造句嘗有登三汊河浮圖作日天到潤州連海白山
從建業過江青南渟先生極歎賞之

高繡英

繡英姓高氏山陰鶴莊少府長女也性敏慧能詩文小楷工絕乾隆五十一年少府宦長葛女隨任以代父作箋札知名豫中少府試用時字女一幕客子非女意也丁未春將行親迎禮女素聞所天頑劣又於伯氏處得其家瑣事徬徨數日竟以正月十三夜自縊死死後父母檢其衣物皆收拾精潔鏡奩中有遺敘一紙曰繡英生庚寅二月初三日子時甫二齡隨祖桃源任所旋以父試用中州自淮抵汴蒙親教之女紅窮之翰墨性雖愚蒙頗知大義天高地厚何日敢忘然自甲辰許字以來屢聞家多變故室有勃谿鍼縱刺心碑難吐口未嘗

不念世無不是姑嫜亦豈有全名媳婦但英以閨內嬌娃未諳階前鞭撲輕盈弱質懼井臼之難操宛轉孱軀恐晨昏之莫逮六禮未行驚魂已斷雙禽乍告妖夢屢占况自去秋父補繻葛門惟薙草庭可張羅八口嗷嗷艱於宦食何忍以九京就盡之身重貽二老出閣之累所望諸弟妹曲體親心善全孝道則英雖死之日猶生之年痛哉大限臨身莫能自主子職旣虧婦道何存語無倫次血淚滿襟一息哀鳴諸乞恩宥女所著作臨歿時皆自焚棄此文前半作楷書後則淚跡縱橫字亦不復成形狀少府談及猶流涕云

瓊府侍姬

丑寅之間余與蔚文設扶鸞戲神來有署名瓊府侍姬者問其姓里曰玉容何氏小字阿瓊江寧句容人生崇禎三年今以訪緣暫住臨安與談明季事娓娓可聽性喜吟咏其降壇也有詩贈答也有詩余最愛其自序七古一篇妾家舊向句容住三點茆峯通指顧青青黛色捲簾看畫眉粉本誰能誤牽蘿補屋水迢迢繡檻春深夜上潮十二紅樓年少女一時爭羨阿瓊嬌阿瓊十三工織素十四采桑南陌去朝親文翰暮箏琶二八光陰豈虛度結綺臨春事再逢扁舟飄泊苦西東無端拋却

香閨伴來上吳山第一峯吳山柳映湖隄綠殺氣忽驚滿川陸湖水乾枯柳作薪三更戰鬼啾啾哭阿父從軍去莆田瑣窗一旦委花鈿驚魂生怕隨驕卒柔魄何妨伴水仙湘妃昔日朝金闕碧海青天望超忽訪舊神飛芍藥烟思親淚灑枕椰月別有深情滿懷抱玉鑑塵生愁不埽春來春去恨茫茫花落花開總斷腸安得九疑山下竹年年飛集紫鴛鴦蔚文嘗眷一妓曰小芸情意甚密一日攜之來叩以婚嫁事姬曰緣盡此矣因爲剖晰前生及未來事姬多情遇高才士依依不忍捨竟以見夢春阜生爲震雷所驚先是春阜生從蔚文客吳名

籍甚然性太狂人不敢交姬一見首贈以詩且曰妾訪君三世良緣不偶往往覲面失之今得遇天也自此遂日日來來必召生其見夢事甚詭祕蔣子雪舫雖載入小傳不過髣髴瑤宮花史傳爲之惟是夜月明雷震遠近皆聞姬有婢名春翹嘗代姬降壇蔚文偶以詩謔之翹拂然曰姻緣事來不能拒不來不能強忍一日性可多致數載歡君陽算有限冥福無窮奈何以輕薄自壞姬昵生翹勸之再三姬去翹亦不復來蔚文又誦姬風入松留別詞曰不將清瑟理霓裳寂寞對離觴鸞笙乍譜東風緊歡悰付湖水湖光芍藥多情含淚海棠無語

凝粧小姑居處本無郎此後更蒼茫吳雲楚樹三千里憑誰寄錦字香囊報道佳期未遠人間歲月堂堂蓋周秦遺響也雪舫因生不欲以真姓名示人并蔚文諱之易其名爲袁隱南

論曲十二則

曲與詩餘相近也而實遠明人滯於學識往往以填詞筆意作之故雖極意雕飾而錦糊燈籠玉相刀口終不免天池生所譏間有矯枉之士去繁就簡則又滿紙打油與街談巷語無異夫曲者曲而有直體本色語不可離趣矜麗語不可入深元人以曲爲曲明人以詞爲曲

國初介於詞曲之間近人並有以賦爲曲者賞音可觀
定不河漢余言

明人曲自當以臨川山陰爲上乘玉茗還魂較實甫而
又過之特溟滓已穿頗類未除南柯邯鄲二種斂才就
範風格適上實足前無古人後無來者青藤音律間亦
未諧其詞如怒龍挾雨騰躍霄漢間千古來不可無一
不能有二餘若浣紗之瀟灑明珠之雋秀紅拂之峭勁
義俠之古樸西樓之蘊藉玉合之整鍊龍膏之奇恣香
囊之謹嚴紅蕖之流利一邱一壑亦足名家鼎革時百
子山樵以詞名天下所編燕子箋盛行宮禁品其高下

尙不能並若士幼作之紫簫此外汗牛充棟自鄙無譏
矣

自化工畫工之論出而西廂琵琶之品始定然琵琶究
不及西廂實甫香艷豪邁無所不可東嘉一作典貴語
便筋努面赤蓋文章一道均可以學力勝惟曲子必須
從天分帶來明嘉隆中王弇州以詩文爲七子弁冕而
所著鳴鳳記淺率頽唐一似全無學識者何況他人世
之左袒東嘉不過曰西廂誨淫琵琶教孝夫旣置其文
於不論則固非余所敢知耳

臨川填詞多不協律沈詞隱貽書規之臨川听然笑曰

余意所至不妨拗折天下人嗓子不朽之業當日早已自定今人捧九宮譜繩趨尺步奏之場上非不洋洋盈耳及退而索卷玩誦未數折卽昏昏思睡夫人固不可過才又何可不及才跡弛之馬苟操縱得法終當百倍駑駘必也四海賞心梨園從律屏山燭樹雅俗盡歡茫茫今古吾見亦罕

西廂以下高旒齊名然君美之視東嘉尙猶江黃之敵荆楚明人盛稱曇夢則緯真初下筆時亦自夢想不到此正如六朝庾徐長慶元白一時風尙徼幸並驅至步武一說還魂繼崔香囊繼蔡若士後勁有餘九成中郎

一忠一孝允足相配其如詞之不稱何

詞至西堂又別具一變相其運筆之奧而勁也使事之典而巧也下語之艷媚而油油動人也置之案頭竟可作一部異書讀石渠邊幅稍狹風韻灑如西園畫中人工二種尤足紹規曩哲 國初人才蔚出卽詞曲名家亦林林焉指不勝屈必欲於中求出類拔萃則高莫若東塘大莫若稗畦靡旌摩壘殊難爲鼎足之人

笠翁賓白縱橫變幻獨步數朝迄今憐香伴各種傳奇流行海內幾於家絃戶誦其慎鸞交開場曲曰可惜元人箇箇都亡了若使至今還壽考遇余定不題凡鳥余

謂笠翁填詞實非當行不知何所恃而自信若此大抵私智勝則規模不濶大巧句多則筆墨不莊重以此劇切笠翁當亦心服近人刻十種曲有殿以盧淳二夢者吾恐簸之揚之且不啻糠粃在前矣

江湖內十八本外十八本梨園缺一卽非佳班其實可傳者不過十之二三餘皆村褻鄙俚不堪入耳而父以傳之於子師以授之於弟設填新本付之搬演苟非有大勢力彼必委而棄之曰不可唱夫詞不可唱者固多可唱者亦不少元代佳詞如林當時卽稱荆劉拜殺文士之取信梨園亦有幸有不幸已

古律載六宮十一調傳者僅十之七而般涉大石小石諸調又祇寥寥數曲蓋曲學幾於亡矣余意宮調定格當如還相爲宮一宮有一宮之聲韻一調有一調之節奏周德清中原音韻所云仙呂清新綿邈南呂感歎傷悲義雖不傳其意可繹不然何以北曲正宮可與中呂並用又可用般涉調煞而他宮不能南曲有仙呂入雙調而他無有今之唱曲者僅記首三字爲標目問以牌名尙茫然不知詞家亦幾等宮調爲贅瘤世有周郎乎吾當鑄金事之

詩餘興而樂府廢雜劇興而詩餘又廢絃索之用愈變

愈卑今雜劇雖廢有志紹述古人不遠尙有門徑可尋
詞家目不見元曲偶以南詞變北劇人輒譽之曰宮喬
曰鄭馬問以孤裝參軍名色往往目瞪口呆不知南北
徑途判然各別既名稱倣古無論賓白詞章諸大者卽
小小排場譬如飾古彝鼎座匣必須椎樸摹晉唐名畫
著不得一件時用器物由此以推思可過半

太和正音譜及點鬼簿載元劇千餘本陶九成輟耕錄
自云見元劇七百餘本而錄中所列名目半不可解今
存者自臧晉叔元人百種曲外寥寥無幾百種曲雖多
點竄要亦餽羊蓋雜劇卷帙不多易於散失藏書家又

以無關經史置不寶貴苟非彙而刻之風霜兵燹日復
一日必至消滅淨盡晉叔之爲功詞壇豈淺鮮哉

李太尉代汾陽治軍號令纔出壁壘一新詞家具此手
筆者惟青藤改崑崙奴可云無忝臧晉叔刪訂四夢詡
詡然自命點金手無奈識不稱志才不副筆將原本佳
處反多淹沒昔賢不云乎鶴頸雖長斷之則死鳧頸雖
短續之則傷晉叔沈酣元曲旣於詞壇不敢染指乃復
有此輕妄之舉自知之所以難也若西廂一記李日華
以北賡南則裂鄭錦以補鶉衣碎楚玉以飾甕牖實甫
何辜寃遭此劫

劍南室校刻

北涇草堂集卷之三

會稽 陳棟 浦雲

詩

雜詩

歲運無春華舉世皆闇冥及其既徂謝又復相鄙輕造物賦百卉原蘄秋實成豈知顏色好終日笙歌盈黃菊植西圃凌寒吐金英芳馥亦無幾樂稀悲不與葆光避衆好可以全令名

荆山有美玉精光蘊千春良匠不世出抱璞全其眞下士昧天道營營求見珍楚庭一再別淚血飄荒榛躁進

名所忌異趨衆無親温潤廊廟器時來自聲聞哀哉卞
氏子炫異乃毀身

盈盈江中水皎皎江上姝胸羅芙蓉鏡腰結明月珠揚
舲泝中沚長跪攬子祛神女顧且笑解佩繫羅襦悠然
吹長笛龍駕騰九衢一珠豈足貴所愛千金軀光彩難
復接精誠將安舒

湛湛秦時鏡肝膽明於水千載久淪棄暗淡積塵滓鉛
刀非利器羞與太阿比當其淬厲多小試亦可喜君子
貴自愛美質安可恃

吾聞南山巔有虎伏窈冥吐納天地氣呼吸日月精搏
殺日數百衆獸懼威靈一朝不得志貶道以求生狸鼯
腹未飽巖穴勢莫憑制命獵夫手鼎俎隨魚烹所以老
氏教守雌必戒輕

鷗鷖當秋天羽翮勁無對胡然宇宙空苦就樊籠隘玉
爪利鋒銛金眸光炯碎每懷調餉恩焉能拾草芥一旦
突煙雲條鏃越流輩翻身擊惡鳥毛血遙空灑長鳴謝
主人冥冥海雲外

春陽何熙熙蔭此瓊樹林柔條忽掩苒綠葉相與深珠
露日膏沐飛雨下碧岑倉庚亦有懷交交流好音日暮
迫元景中庭寒氣侵攝衣對蒼翠晚節愜素心區區東

風質何以答秋陰

空庭佇涼月泠泠彈鳴琴浮雲忽西去零落吳山岑京
洛一千里寄思力不任慷慨裂危石坐感歲月深繫昔
同棲鳥奮飛各青林天闕多網羅流光逝駸駸行矣慎
所欲無負巢居心

巫山高

巫山高不可極湘水深不可測山高水深會有窮人情
變幻誰能識朝爲兄弟暮寇讎平地頃刻生荆棘陳餘
昔友張景王杖箠趙國同開疆一朝赴難值讒間收解
印綬分元黃漢兵夜塞井陘道成安血濺河隄草英豪
契合非尋常刎頸交情猶難保人生意氣足殺身結客
空散千黃金要路自古有必忌何況睚眦先存心巫山
高湘水深

白頭吟

白頭吟長門賦相如一身兼兩遇男兒心事如轉環誰
能抑鬱守平素今人嫁女重多金剪裁綺縠爛錦衾燕
釵一值數十萬珊瑚木難紛若林臣寵主易驚女富夫
難使天地有轉移何事久可恃白頭吟昔日桃花開今
日桃花死灑灑白玉杯湛湛東流水江水東流去不迴
桃花零落空相隨寄言富貴人父母慎勿多金誤女爲

雀飛多

雀飛多集於木羣向田中啄嘉穀果腹不已農人夜哭
農人哭黃雀喜擡眼忽見青鷓子

新晴

見說新晴好關情一上樓斜陽收雨脚危嶂亂雲頭投
筆懷遺事登車侈壯游荆襄渺天末慚愧欲依劉

古意四首

郎居范蠡城妾住若耶溪郎若來相訪依依柳拂隄
黃鶯太無賴啼向綠窗中欲驗宵來夢羅衣忍曉風
盈盈對鏡臺紅淚不曾揩舉頭見小婢低頭看鳳鞵

初八至十五夜夜望明月圓是郎邊圓缺是妾邊缺

蒿里曲

生以養爲福歿以土爲室奈何任風水不使歸墳塋時
俗重葬師輕祖考高會纍纍十數棺往往家中停日夕
馳車馬高下窮原陵必得朱紫貴或取貲財盈自古山
川秀盛衰迭變更凶得之而敗善得之則榮試觀帝王
宅秦漢俱咸京二世子嬰滅赤伏乃再興郭璞造葬經
宅先豈不精福澤尙未見駢首石頭城明興三百年誠
意稱寔能身死子孫廢沐徐世公卿箕疇占敷錫五事
皆足憑鬼神能佑人非理難順承況彼庭戶際水火所

必經一旦有緩急萬死詎足拯福是後人福禍獨先骸
膺哀哀蓼莪子聞此當吞聲

山寺曉起同薛雲坡村市小飲

鳥語破幽夢僧寮交輕風披衣向礪戶捲簾臨沖融花
泣露未收山曉雲尙濛須臾旭日出散影光瞳矐良知
策筇杖相攜寒溪東平林接清曠危磴懸玲瓏寄跡永
和客遐思柴桑翁澄觀無今古一酌山桃紅

表忠觀

榮華不必父與祖家世不必韋與杜老樹還鄉盡錦衣
盜賊一朝稱尙父世間真有此怪事萬弩射潮潮不至

嬰兒股掌視朱温後來何人知其意保障全越功豈微
青史元無真是非羅刹江頭白浪高西湖絃管日敖曹
君不見表忠觀裏莓苔綠豐碣祠官世代遙

讀荆軻傳

姬丹真乳臭豈識人中豪樊期小丈夫血乃汚吾刀登
車去不顧易水風怒號惜哉燕市筑朽骨同蓬蒿

古意

浮雲西北來鬱彼庭中草庭草忽已萎顏色無常好日
日彈箜篌和鳴苦不早瞻君一月餘思君令人老山色
何青青水光何浩浩四顧淒以傷秋風生遠道

雨中聞笛寄松水

積雨久不歇，笛聲何處幽。故人契濶盡，臥病竹西樓。山霧紛紛白，江花淄淄秋。倚闌情不極，辛苦是蓬游。

吳江歌十首

并序

余往來錢塘江上，聞舟人所唱吳歌，其音清遠，激揚頗有竹枝遺意。特詞語淫褻，未足供文士採擇。舟行無事，戲爲改製十首，付榜人婦歌焉。

儂家江西鳳凰山，郎家江東芙蓉灣。山上雲來灣畔雨，郎舟一去幾時還。

龕山西接赭山，平早夕潮來天地。青堪歎郎心不如石，隨潮直至百花涇。

春半河豚初上時，青簾小櫃賣吳姬。勸郎魯酒不須醉，前浦萸蒿筍更肥。

伍相祠邊花正鮮，觀音塘外水連天。彈箏小伎如相問，月白風清郎在船。

與郎小飲碧紗窗，慵髻婆娑映晚江。沈醉倚闌看明月，不知鷓鴣自成雙。

阿儂生小住江東，日日江頭理短篷。多少載人夫壻返，如何不及石尤風。

十里橫塘草色齊，春山如畫罨前溪。鄰舟迅速郎休盼，

玉面紅妝是妾姨

海中月出鷄子黃照見船中蘭花芳月裏蟾蜍花上蝶
憐渠空到茜裙傍

東浦香醪萬斛春西湖藕色白於銀問郎何事不歸去
日日孤舟泊水濱

勸郎莫愛凌波仙勸郎莫惜買花錢四王廟邊風未息
羅刹江頭春可憐

倪蔚文古劍歌

并序

劍長三尺蔚文銘曰當決而決羞一人敵下注
倪子元豹用劍六字不見者三年矣今春拜其

長者則此劍仍懸座右撫摩歎息不自知神之
傷也

蒼鷹交馳風聲急肌骨颼颼寒氣襲電光閃閃搜北牖
罔兩潛逃鬼神泣酒酣撫此劇悲哀涓涓淚流衫袖濕
主人童稚相與驚問余何事傷心情此劍形製久所識
曾見我友相隨行南湖大雪燈火青中夜起舞聲錚錚
三年以來罷遊宴太息幽城闕芳甸松杉四合宿草荒
鶴鷁夜呼韶華變流水高山永莫期安問青霜與紫電
嗚呼倪生當年膽如斗今日銘詞空在口吳季挂墓終
徒然雷煥躍津亦何有劍乎劍乎酬汝一杯酒慎勿失

主夜作蛟龍吼

納涼

獨坐向庭戶曠野飛雙禽交翅互上下倏復歸故林此時萬籟寂溪水揚清音錚琮礪石上誰奏太古琴松柏轉蒼翠嵐光相與深聽鳥有遐志觀水無煩襟起視日移晷嘒嘒秋蟬吟

吳尙書兌故第

尙書宅第背山開大樹烏啼日幾回猶憶九重親授節欣從絕塞夜傳杯箏彈毳帳闕氏入花簇雕鞍勅勒來此後安邊無勝算清門還爲黨人哀

九日登龕山二首

時方哭薛雲坡

地豁登高日天迴落帽風波濤江岸壯意氣酒尊雄秋草半山白霜枝無數紅狂歌思劍舞懷古興誰同去歲茲山會吹簫約薛收林泉猶勝跡風雨孰同游野鳥傷心噪巖花滿目愁僧房莫頻過此亦古西州

渡狹獠湖

漁歌起湖西樵歌起湖東晚風迭牽引隱約菱蒲中我來板橋下短棹隨雙童拍手一相和水碧天空濛

贈西溪隱者

鳴鏑響絕不知處涼月蒼茫滿山路客來每話少年游

帶甲輪臺更西去嚴霜萬里燉煌城夜聞威築悲長征
拔刀起作殺賊狀坐覺金印胸前橫絕壑鵬翎滿秋氣
十年多病身衰廢驚心莫問乍歸時囊首公階對法吏
酌酒與君小破顏林泉且莫悵投閒鳴箏少婦封侯夢
多少征人老玉關

送劉生由邯鄲之潞

錢江浪高水拍舟風雨蕭颯蛟龍浮如澠之酒不快意
一杯爲君商聲謳丈夫出門志萬里決捨豈屑同蝸鳩
京師雄峙九州拱其中冠蓋多王侯觀水至河山泰岱
登眺纔足開雙眸念昔吳地兩攜手爭奇彼此矜琳球

一從春華各分散詞場無復持戈矛我今廢學已三載
行止潦倒將誰尤南張北周奮飛疾寧有獨滯中央劉
邯鄲大雪歲聿暮寒氣凜冽生衣裘層冰似刀割膚骨
墮指滴血凝不流西望太行路阻修崖石犖确愁轅軸
長平關前夜飛礫月冷鬼哭時啾啾鄉豪里俊自相結
聞雞起舞誰同儔行矣劉生慎勿留來春花發金臺游
再送劉生兼寄蔣雪舫大梁

劉生灑氣排雲霄曉踏舵樓望蒼莽一雙鐵麓呼長風
白波迅激天震盪酒酣握手言此行由魏歷趙再西上
我聞黎陽地雄險當年朱李互爭攘沙陀健兒善繼志

盛矢錦囊厲兵仗夾河呼譟屋瓦翻十萬敵軍齊稽顙
君去訪古昭義鎮想見復讐陳廟饗回首應笑平原君
虛名賓客日羅網馬服一敗丁壯盡慘對成川血泱泱
解圍制寇無一謀祇藉鄰交保封壤我生尙氣愛結交
憶與君輩共遊賞吳山絕頂松徑涼縱論青史情慨慷
蔣生跣弛才不羈目送歸鴻獨神往近聞作客在梁苑
頗有時流相激獎從昔畸人當隱淪監門鼓刀意自廣
三秋故園好風日煩君傳語促歸鞅丈夫義不受吹噓
安用天涯久飄蕩

鑑湖賽神曲

畫鷁旌旗水沒篙太平橋外是柯橋樓頭處處喧腰鼓
簾內家家吹洞簫

三江開水流復流陡疊龍船休未休兒童向晚不知倦
更結紅燈清夜遊

今年清明值三月弄晴作雨春顛狂曉色乍開歌管鬧
冶遊不怕墓田荒

跨湖橋外柳絲長跨湖橋南桃花香明日馬公祠內去
儂家一一鬪新妝

小姑十五手纖纖花底偷來揭畫簾忽見春山好顏色
又添新恨上睂尖

桃葉桃根打槳來香風十里錦城開阿儂舊願靈旗下
故著銀鐙未肯回

雲鑼報馬過春街紗結鞦韆絲作牌貪看西郊烟火好
不知失却紫金釵

柳塘落日鼓逢逢密約烏篷女伴雙兩岸榴花紅似火
大家侵曉泛娥江

曉登爐峯與心上人

曉色僧居迴春輿鳥道紆陡然臨絕檻直下見平蕪海
日生襟底天風散座隅清齋期信宿玉版許參無

雜題畫冊六首

胡元潤畫

隔岸鳥驚前日雨沿江紅映幾株楓漁人繫纜不歸去
家在蘆花淺水中

董華亭畫

山鳥寒依牖溪雲夜到門不知人世裏何處有仙源

陳詹公畫

溪山妙入神雅與性情合怪石鬱離奇懶雲閒似衲童
子沽酒迴天風吹松笠

藍田叔畫

村醪麥飯餉山妻圩外秧針色漸齊愛殺江南老農圃

偶耕話雨綠楊隄

楊龍友畫

老樹鬱槎枒溪漲前村雨不見山中人寒鴉自來去

上官周畫

轟轟危峯翠插天春流滑石屢洄沿茗中風景多如此
日夕菰蒲夢釣船

幽居答珠士先生見寄

小閣春深花亂開蓬窗雨過竹新栽古琴掛壁日三弄
老鶴依人時一來坐有詩書長對客胸無意氣不登臺
倦遊更問天隨子分得山僧酒幾杯

州山鷲峯寺用少陵萬丈潭韻

扁舟訪古剎漸近跡漸晦梵唄忽滿空鐘韻不在內行
行度翠微處處闢青靄野鶴鳴一聲蒼然寺門大怪松
百丈虬拏攫自相對厯階見清池飛鳥落澹瀕俯覺坤
軸窄仰驚天光碎連山抱廊宇極目迴無外中有二三
僧塵心息旛旒花香難爲名泉流自注瀨憶昔趁遊覽
高興違儕輩三載結夢勞一朝豁意最揮手初地侶棘
荆莫恐礙看余凌峯頂暢觀風雲會
余向有和魏夢溪
先生句曰他時會

約棲禪侶乘興青溪一濯
鞭荏苒三年乃克酬斯夢

由龍井度嶺至永福寺

筍輿止前峯峯險境逾拓捫蘿登紺壁俯身結芒屨杉
影何奇古蜿蜒就拏攫樹際見湖光清冷抱城郭野果
垂纍纍暗泉流澗澗山鳥撲面飛崖翠拂衣落時聞梵
唄韻瀟灑出林薄靜氣沁心骨轉忘山中樂扶筇憩精
舍解帶屢磅礴何處一聲鐘西風送歸鶴

尋理安寺

翠色莽無際孤吟日欲曛野猿呼澗雨山鳥啄春雲地
僻漁樵雜天清鐘鼓聞湖光貪伴客十里尙沄沄

玉泉道中

石逕斷雲邊山光碎林外何處一聲鷗蒼翠滴衣帶

湖月二首

驟雨生衆涼湖光碧於染月色忽滿湖搖搖金波閃
見月如見僧呼之共徐步還顧湖上波蕩漾自西去

西湖懷古三首

坐擁江東十四州歸鄉父老盡搥牛不嫌盜賊能高位
可惜勤王少遠謀慷慨封疆西拓日蕭條宮眷北行秋
表忠觀草留餘憾應是難忘脣齒讐

回首錢塘潮汐奔桑田鹹鹵海天昏縱餘井渫民堪食
尙少泉源稼不蕃葑岸春深溪澗溢石函秋暖水雲屯
後人浪說詞華好誰向孤山薦酒樽

符離北望勢如何歎息軍中絕凱歌萬里版圖金日月
六橋花柳宋山河壯懷未得麾軍幟和議誰當止敵戈
獄底含冤驢背老悲風千載咽湖波

送韓二丈

貧戀詩書味老知交際心醉來長擊筑歸去獨攜琴春
色筵前短江濤渡處深此行家日近話舊莫沾襟

十四夜月同顧吳二文學小飲吳山卽以贈別

乍插茱萸醉碧岑劇憐夜景足追尋桂從僧院留香久
松向山亭得月深茶板粥魚風杳杳斷橋荒岸露沈沈
團圓尙有來宵坐漫對清樽愁不禁

長歌代柬寄張翁雨村

昔年曾讀湖上草芙蓉映波光浩渺今日又讀天台詩
長空唳鶴天馬馳拍手一歌一擊節眼界峻嶒雙耳熱
花香月朗翻春嬌夜靜燈寒驚霆霹越水吳山隔數重
轉恨生平未親炙山陰高生儒者流蹇驢冷淡歸清秋
道翁襟懷哦翁句酒酣日落思悠悠我亦兩度湖中宿
自倚艷聲按新曲譜載月舟雜劇雙高峯冷不見人夢繞天台
烟雨足天台最勝赤城霞青苔白石仙人家國清寺外
一溪水鐘聲催出桃源花詩卷分明指去路得得籃輿
竟何處單衫席帽歌鳴鳴也當玉真訪幾度秋風涼信

滿江邨西子湖邊好採蓴恨不識翁華頂月恨不識翁
葛嶺春何時卜居孤山麓來就騷壇一問津

聽楊山人彈梅花三弄

試彈密雪又輕風人在羅浮綺夢中翠羽乍啼山悄悄
綠醅小坐話忽忽半枝踈影橫窗瘦萬點寒香到地空
我有離情君識否一聲好與寄江東

雪招倪鯤池用歐陽永叔韻

禁體

仲冬三見樹添萼潑水長苦衾裯薄夜來慘淡威愈加
曉起看天雪又作寒江一派失空濛疊嶂千重混遼廓
古松飾秀增槎枒紙帳借光驚閃爍濺濺園竹折復起

灑灑檐牙壓欲落野老撥杖慶來牟貧士閉戶羨狐貉
獐兔出穴獵正豪魴鯉伏淵網可攫啁啾覓食憐飢烏
徘徊近簾嗟凍雀何人發與愁騎驢此處頗幽宜結屣
夜舫昔傳子猷訪戰筆今擬東坡樂圍爐吹炭酒足溫
暖壺裏氈茶屢瀹倚門乍喜神清冷擁鼻未嫌思寂寞
詩成鼓琴小歌風袖冷舉蔗戲舞槩君如披氅能巡簷
相待花前一笑噓

三俠圖

日久無隋主交能結衛公草茅有賢傑閨閣亦英雄望
氣龍文見回頭霸業空中原休逐鹿大海已冥鴻

送孫十二

君欲送我我未去我今送君君眞行可憐今夜山陰道
猶是孤舟共月明

送鯤池扶柩太原

聽罷江潮萬感生麻衣腰經事長征慈親白髮存亡淚
愛弟荒廬去住情驛路曉風韓信壩馬頭細雨趙襄城
哀思到處添振觸愁殺天涯孤客旌

發杭州却寄諸從叔

客緒紛然不可芟紅樓翠閣映蒲帆望中谷水愁征棹
夢裏陽明憶舊巖風帶笛聲侵倦枕月涵嵐氣點輕衫

殷勤寄語西園竹留取春光待阮咸

鄔鎮道中雨同孫九作

吳山到眼尙參差越客歸舟是幾時一夜烏程道中雨
誰家玉笛怨楊枝

盤門柳

去歲落花縈舞席今年飛絮逐池萍可憐雨急春無主
莫恃風和眼獨青殘夢夜寒經古戍荒江人去憶離亭
酒酣爲爾情難遣玉笛橫吹忍再聽

丹陽道中

欲雨不雨天將開未開日積暑蒸孤篷鬱鬱不能疾觸

手盡沾潤求歡殊寡術安得東南風吹此梅氣失坐對
觀音山空江慰蕭瑟

京口行

君不見丹陽之北京峴東樹木交錯何龍葱秦皇鑿山
洩王氣後來屢見真英雄建安蛾賊紛馳突碧眼小兒
乘時發百戰力拓父兄基北走老瞞東定越鐵甕城頭
冷暮雲典午侵擾尤紛紜生子當如孫仲謀何須不識
劉將軍桓家兵來氣蓋世將軍勤王撼天地功成置酒
凌歊臺歌風欲追漢高帝十載礮礮戰骨多龍行虎步
誰能過蒼梧電箭蕭公起祠宇轉眼生烟蘿徒有忠臣

袁開府碧血光芒照千古依稀猶記讀史時擊碎唾壺
夜深舞大江滾滾日東來滄海幾變成蒿萊南徐雄鎮
今如故北顧風流安在哉倚棹蒼茫不能去歎息昔人
空割據一拳招隱草青青欲訪昭明讀書處

登北固絕頂眺江

岷江萬里瀉胸間絕巘高風徑獨攀天險北來爭鐵甕
地維東坼阻金山荻洲日暮愁雲壓戰壘秋深舊血斑
太息蘄王禽敵後偏安誰省扼雄關

金山守風

五兩搖搖指北風扁舟坐對浪千重帆光不度瓜洲樹

月色偏寒海嶽鐘何處漁歌悲極浦連宵歸夢繞青峯
穗烟零落三生杳愁向蒲團問舊蹤

新河

天風吹不斷掛席入新河沙氣仍侵袂波光漸作渦晴
嵐踈處碧語鳥靜中和燈火漁莊晚孤舟奈汝何

雨過却望攝山

征帆如白雲蓬蓬去不息帆迴雲乍捲有時見山色攝
山本秀麗蒼翠不可極況經新雨過巖壑淨拂拭石瀨
鳴濺濺潭光冷欲逼心知棲霞僧廬舍鬪荆棘趺坐長
松下舉目渺相識抱琴叩禪關發願誰復抑日暖長風

來鐘魚杳天北

燕子磯曉發

海色動天東餘寒猶在空人聲青嶂外客夢大江中萬
樹爭殘月千帆驟峭風聽雞遙酌酒灑淚六朝雄

浦口登陸

峩峩大艚趁潮開浦口迴看亦壯哉山色南連吳樹落
江聲西擁楚雲來柳依古道入初去草滿空城笛已哀
我醉不知登陸苦欲驅蹇衛上層臺

烏衣鎮阻雨

漠漠遙天暗悠悠生事微連宵聽苦雨三日住烏衣野

火狐狸嘯荒庭蝙蝠飛浮雲與流水羨爾澹忘機

滁州懷古

瑯琊溪畔夕陽橫豐樂亭前野鳥鳴流水依然侵驛路
青山終古抱州城興王事業銷秦劫太守文章出漢京
今日遺民還拜祭雕蟲真不負儒生

淮上偶成

細雨千帆暮孤雲萬里遊驚心大淮水日夜向東流

潤州與友人別

浮雲晉豫路初分隔艇相呼意轉殷同是順風同解纜
酒醒愁殺渡江人

蒙城夜泊寄家鼎暹兄

別業巖兼壑生涯笑復歌兄當念萱草弟已逐蓬科風
露祇如此江淮今盡過前途各努力莫愴夜猿多

對月懷陳楓江鄒橋村居

今夜好月色大似鄉居時開簾酌卮酒抗袂懷前期故
人有幽築窗戶臨江湄十載舊過從今來忽乖離遙憶
此時坐襟帶風颺颺荷香滿几案漁唱盈漣漪我欲望
南雲山川虧蔽之夢寐不到家何由尋交知舉頭望明
月碧天行正遲安得託光影寄我長相思

十九里溝

曉起天宇涼捨舟步平陸風迴禾黍開稍稍見茅屋雞
犬馴不驚場圃互相簇垂楊蔭流水兒童抱黃犢牆壁
交延緣園桃正紅熟父老見我來相邀坐林麓殷勤羅
酒漿參差列肴藪連日苦塵氛對此豁心目古來淳樸
風何必定空谷欲去仍留連蟬聲滿修竹

亳州舟夜

連宵燈火空隄泊滿目雲烟對酒愁遠樹爭迷三楚望
諸兄誰憶小黃州天涼角吹侵蓬鬢月黑鐘聲繞驛樓
明發祇餘西去馬驕嘶喜踏宋中秋

蟬

汝德清無極飲餐甘寂寥如何夏幽響轉似怨秋朝斜
日滿高樹晚風生斷橋酒酣人獨立涼意忽蕭蕭

白蓮

本少淤泥染此花姿更妍淡香明月外薄艷晚風前入
夢水無際捲簾秋浩然緇衣吾豈好回首愧塵鞭

睢陽行

赤心奴兒氣蓋世頭戴兜鍪口稱帝天子方歌蜀道難
吾民豈保江淮地張公此時鬚髮張手提義旅來睢陽
睢陽太守能讓善授以威柄無傍徨黑雲壓城城欲裂
賊兵萬騎來馳突獨將隻手阻洪流不許黃頭窺楚越

當時不識南霽雲，寧復知有雷萬春。中面六矢屹不動，
公所用士真天神。戰守相持六閱月，糧已盡兮民不懾。
以心感人人，心歸豈在區區殺。一妾賀蘭豎子何足誅，
李郭當年亦丈夫。半載羽書豈不達，坐令碧血成荒蕪。
臨危慷慨雖殊狀，千載行人均仰望。斬王一戰障東南，
二公勲績何多讓。睢陽城上黃沙愁，睢陽城下啼鵓鷓。
停驂欲問觀兵處，一片斜陽草際浮。

睢州曉發

侵曉起行役，雞鳴月未上。衢路多木石，詎敢控羈鞅。鈴
聲空際來，咫尺不可仰。拂衣知柳長，聞聲覺溝廣。僕夫
怪我遲策蹇，竟前往須臾。涼風起爽氣，散林莽。小鳥不
知名，交交弄清響。旅人懷百憂，及此頗心曠。行行指前
途，勿待炎威長。

小河鋪聞笛

昨日睢陽道，塵沙暗晚曦。今來小河鋪，楊柳映疎籬。征
旅正多病，風光欣及時。那堪橫笛下，一一怨龜茲。

陳留弔蔡中郎二十六韻

一代稱高行，千秋仰異才。枝聞連理秀，碑爲六經開。漢
運方凋喪，清流屢剝摧。固喬鈞罪首，孔李黨人魁。帝正
思隆郅，臣寧惜忌猜。阜囊宵奏事，洪範力陳災。危語驚

中貴飛章出上台銀鐙連威屬遷徙極烟埃盛誼銷魑
魅孤忠動草萊俠徒剛不殺權府又相推自古文章士
恒多意氣頽草書季長恨投閣子雲哀邕也雖存正前
車竟暫陪空傳阻狂僭那得抑奸回亡命還憂貌成仁
豈易材銜恩眞已矣動色亦何哉廢墓餘黃土荒城滿
碧苔因君身污沒感我馬遲徊顏彩招文網光榮肇禍
胎設身當變患處已得衡裁宦跡應知誤名心苦莫灰
祇將垂十意不惜列三臺挫折嗟鳳羽髡鉗怨鳩媒玉
瑕工可棄尺枉道難恢今世饒英傑吾生愧隸僮莫教
出處錯貽笑後賢來

寄內

河水悠悠鑑水斜夢魂那惜路途賒誰知一夜關山月
君向天涯我到家

劍南室校刻

北涇草堂集卷之四

會稽 陳棟 浦雲

詩

大梁懷古四首

信陵高誼燦如雲
駐馬夷山問夕曛
百代聞風猶下士
一身去國獨憐君
疎烟淡月侯嬴館
斷梗荒榛朱亥墳
歎息孟嘗空狗盜
更無奇策動紅裙

黃袍香靄御爐烟
一掃中原再定邊
鐵塔有靈悲漢月
金陵無地鑿唐蓮
阿衡持國會聞道
使相成功不用錢
千古枉談和議錯
龍飛早是棄幽燕

九葉繩承鞏帝州當年曾此設金甌聲聞杜宇幾先兆
慟到安民事已休洛蜀爭傳君子黨燕雲誰進輔車謀
祇今唯有隋隄柳日日西風送暮愁

西來蟻賊劇披猖藩邸羣誇第一王不惜錢刀求死士
欲全宗社見高皇黃流預決天難問碧草無情宅就荒
試向筵前催樂府金梁橋月尙如霜

延慶觀

卽宋朝
元閣

步虛聲換玉簫音古閣摧頽草又深莫是宋家舊香火
碧天無際露沈沈

涓川道中贈別顧文學

金閭春杪送征槎今日相逢鬢有華軟語未闌天欲暮
郵亭和淚折殘花

寄家曉亭大梁兼答青藜

龐生寄我詩數幅云是吾宗之舊作虛堂一展光射牖
目眩口箝神駭愕怒蛟抉石山爲飛壯士奮勇陣方斫
蓬蓬遠春天際浮錚錚精金冶中躍昨宵嚴霜折庭竹
孤吟正自怨漂泊感君詩意忽起舞劍光燈影花錯落
腐遷作史貴養氣名山大川供盤礴君今足跡半天下
那不高文麗寥廓楚中形勝冠宇宙七澤三湘今猶昨
幽憂放浪多美人羨君攜手恣行樂青雲一頓氣直上

大散關高並劍閣北轅夜半登醫無磔磔半空起巢鶴
我亦頗懷五嶽志新婦帷車苦束縛年來遊覽跡稍展
嵩少尙嗟足屢却龐生波磔妙手腕新詩亦如鷹就攫
溱水曲流汴隄接陸行苦勞舟可託叢臺春酒許共酣
轉眼條風滿東郭

汪忠烈公墓

鼎沸乾坤事萬難孤臣隻手欲迴瀾雙忠效死同張令
同知孫兆祿材官李可從三帥無知學賀蘭賀人龍鄭嘉棟李成虎三總兵城堞礮
痕秋後出墓門草色雨中殘東流汝水悲如許應有英
雄血未寒

贈方丈綠巢

雅藝久哀謝古歡誰獨敦人間識清德海內仰高門名
盛遊蹤貴家貧典籍尊汝南才俊地月旦試重論
聽說歸兮好還淳有舊居應門餘圃鶴餉客足池魚老
友半儲酒佳兒能著書皆山樓畔雨問字或容余

過曉亭不值

高閣鳥聲亂春風步履温伊人方攬轡稚子尙迎門花
落圖書古簷虛彝鼎尊相看貪小坐幽興竟誰論

題曉亭感舊詩後

百尺高樓敞幾層遙天笙樂喚能膺楚江舊伴人何在

梁苑新詩怨不勝琴韻滿牀秋寂寞劍光在匣夢飛騰
賣漿事好容吾輩漫向荒原弔信陵

龐青藜畫松歌

我聞青藜畫松如作字時向象外出新意又聞青藜畫
松如作詩力爭險絕迴春姿大梁城頭雪一尺獨立森
然見遙碧閉門不出坐經旬十指隱隱飛霹靂捉筆意
興猶未來呼奴滿酌玻璃杯清酒三升樹百丈斷澗絕
壑風崔嵬我與青藜相得久落紙欣覩龍蛇走畫成約
畧舉昔賢畢宏韋偃不去口青藜怒我信古堅大言古
畫今誰傳作字作詩亦形似此乃我與我周旋吁嗟乎

人生骨幹安可失節耐嚴冬氣炎日君不見大幅小幅
盈中堂青藜在焉呼欲出

偕青藜飲曉亭寓齋

雨過高城春滿林湘簾石磴足清陰亂山影裏人酣酒
流水聲中客抱琴待月不辭千里目看花長是隔年心
鄒枚賦筆今誰寄屈指蘭亭草又深

雙梧圖爲曉亭題

在秋日悲秋秋去復夢想造物重實境人心愛虛象梁
苑八月時氣淨天宇敞羨君城南廬鷗鷺狎三兩庭中
有奇石嵐氣隨雨長亭亭雙梧桐露滴作微響憶昨趁

晚涼杯酒共擎掌君言行路難得景且遊賞愧無蘭臺
賦彈指失秋爽君今當遠行繪此壓鞍鞅披圖風蕭蕭
竹外月欲上追隨余未能小坐默神往

臥佛寺

悄步訪幽郭城市如山林招提滿秋意四圍墜蟬吟入
門見松柏鬱結交層陰睂髮紛碧綠爽氣羅衣襟洞房
路幽邃茶話費追尋道人貌奇古匡坐彈玉琴相對渺
不識神息藏深深孤雲出手指頃刻殊浮沈張目忽謝
客忘機在素心勿作矯志談淆我太始音

拾雁行

并序

衛人有貨雁者客長社囊纍纍皆雁也得錢則
飲市中絕不見其設一機械室中亦無矰繳具
而所售不乏余召而與以酒問其術初甚祕旣
醉乃大言之且曰區區之物余直拾之而已夫
雁之飛有導宿有衛未嘗不患害自防而卒使
人不張一弓不布一網一舉手而其羣靡得脫
者其果孰爲之厲哉作拾雁行

雁飛日薄暮羣宿向洲隩孤雁爲巡邏充斥防寇盜目
倦未敢瞑區區期自効詎知人意巧潛身匿蓬藿夜深
爇編火洲旁乍一照孤雁知有警飛鳴衆驚鬧視久知

無人振翼怒妄報啄項血淋漓兇比雀遇鷓身殘何足
惜苦心勵風操怵息霜露中見火更狂噪泊乎噪再三
毛羽盡推掉目擊口難剖躑躅覺神耗羣雁聽旣憤自
謂絕陵暴快意舒頸足寂寂寐無覺孤雁見人至忍痛
欲相告私念傷已重何堪毒再冒滴淚冰樹枝全身聊
高蹈此時衆雁睡神息正顛倒一一拾囊中功勝挾矰
罟天曉孤雁下呼羣欲前導四顧無子遺臨風默悲悼

送高生遊齊

千里遄征意若何少年豪氣未銷磨黃河春水帆前急
岱嶽晴峯馬上多古劍有情堪共對殘碑鍾恨莫輕摩

齊州親友如相問爲語陳登祇醉歌

贈曉亭遷居卽送其赴閩

男兒四十尙不仕去國離鄉二千里賣賦得值羞買山
朝餽東廛暮西市浮雲旅跡本無常斗室暫且容妻子
插架我方羨圖書葺壁君更富蘅芷少陵灤溪花滿門
子由峩睂月盈几撫景却憶城南廬年來過訪常戾止
亭亭拂天雙梧桐夜影流光露清泚人去庭空螻蟻食
何不移根并植此念君明當登仙霞懷舊道出漸江水
故園猿鶴延頸待茲堂燕雀亦空喜我有敝廬在陶坂
相距高居僅尺咫飄蓬一別又經歲不知松菊誰爲理

君去父老歡宴餘作書報我景何似梁苑臘盡冰霜橫
客子拔劍催長征此行轉愁帆槳利風便不泊西陵城
酒滿新堂雙玉觥目極春意傷春情君聽綺席遷喬曲
已變河橋折柳聲

聞雁

絕塞風沙經萬里一聲宵半忽哀鳴爲誰梁稻謀安計
似恐江湖誤此生古驛月寒毛欲瘁長途霜勁網交橫
羈人更有分羣苦悵望南天夢不成

時方得家夢
感兄客闕信

題心齋竹

并序

心齋圃中種竹有年丙辰孟秋曉岑自襄陽歸

值夏雨旣足新筍坼叢篁間蒼翠殊衆曉岑對
酒惋惜若不勝物候之感者因系以詩

人返籜爭坼賓來涼暗滋相看多別緒倍意惜清姿野
色每招勝官程難及期劇憐夜來月辛苦照行輜

和鹿柴秋草時適有所悼情見乎詞

粘天草色今如此記得晴郊控玉驄綠髮乍驚芳候變
青袍轉惜舊痕同孤根向曉還依日弱梗當秋易偃風
渺渺哀蛩人獨立故園愁殺月明中

偕劉鹿柴徐梅崖莊浩然林曉岑飲朱春亭理刑
官齋卽席成五言長律十六韻并題春亭春風

軒集卷尾

虛館鳥聲合高城秋氣來招邀家醞美晚晚寺鐘催岸
幘賓殊異迎涼夢乍回新愁聽鼓角古跡指蒿萊壯志
原難遣清流未易材談兵時按劍懷遠或登臺薄宦憐
鴛序浮名感鳩媒問年驚節物搜篋得瓊瑰角帳圍紅
燭絺衣坐碧苔主歡稱永夕客喜見鴻裁湘浦颿無恙
長干花自開一官家屢別百詠體兼該牢落銀螭換紛
紜野鶴猜楚歌仍激烈吳唱特低徊入洛人傳陸遊梁
賦重枚五雲望不極念子挾天才

贈周生之琦

璧水春初兆風簷韻載麇髭髦唐正字縫掖魯諸生羣
從三餘課前賢百代名勉旃經世業雲路慎先聲
萬里閩南路飄蓬感綺齡側身親大雅垂涕念先型禮
樂成人易詩歌載道馨辟雍庭肅穆暇日試窮經

渡河

燕人擊筑楚人歌客路逢秋感易多明日不知誰駐馬
太行山翠滿黃河

延津道中

廩延舊壤鬱嵯峩馬首無端此再過投筆氣慙宗慤壯
登樓愁比仲宣多沙禽侵曉啼荒棘山鬼三更嘯女蘿

莫問迴車何太速計程明日是朝歌

答康少山舍人招遊明月山寺

朝日照遠巖金碧輝翠微登城一極目清風相因依太
行壘河內此山境幽奇懷禪自今日企勝從前茲君跡
慕禽向築室丹河湄叢篠十數里畫榼常自攜昨宵苦
溽暑有客來招提餉我山中筍輔以新蕨齏芳緘未卽
啟爽氣羅襟衣豈無一尺屐相隨窮攀躋夙訂病屢誤
佳遊跡慮睽屈指景西顥楓葉千郊肥寄語歸岫雲逸
興無早遲杪秋當獨往弗任猿鶴譏

寄心菴大梁

十載無家別還鄉真夢游淚乾逢棣萼力盡種松楸冰
雪初春盛圖書遠道愁黃山好風景誰遣不長留

暮春有懷

寢跡幽篁裏與石成三戶伊人天一方積念易時序故
燕乍歸巢新筍已盈圃薄陰生暮寒流霞澹踈雨矯首
望停雲彷彿覩睂宇相思兩不移相對獨無語俄頃谷
風起吹送知何處悠悠霄壤間相去復幾許我心如茹
荼君懷諒亦苦

花朝日集春風草堂作

客中誰復勝懷加纔散輕陰策便搗最喜敦槃邀雅集

從無絲竹擾清衙。天因佳節偏多雨。人到中年倍惜花。
三里小街來往熟。流鶯爭笑帽簷斜。
分攜髻榼及銀瓶。設席頻教敞碧櫺。客似浮萍風約住。
春如殘夢鳥啼醒。乍暄白袷貪先試。小病蠻箋愧屢停。
今夜花枝香定滿。不應明月自空庭。

答曉岑寄懷二律

征人馬上度青春。小築仍開汴水濱。載酒客爭談步履。
看花我亦怨風塵。璧璣豈合長韜晦。干莫還須善屈伸。
一卷素書夜相憶。咸平城畔月如銀。
時余暫客通許
函關南上路漫漫。玉笛連營正峭寒。何意羽書馳洛右。

反勞烟景訊江干。佳遊近日逃禪半。清夢當年判袂難。
開札陡驚春事盛。倚樓人已十回看。

夏日偶成六絕句同徐癯仙作

春工紫陌記爭誇。小劫香塵感歲華。一月綠陰留好伴。
麤疎莫厭蜀葵花。

何須佳景羨蓬瀛。窗外疎槐露氣清。一枕曉涼茶未熟。
誤人殘夢是鶯聲。

借得閒園偶舉觴。藥欄高下費評量。送涼怕負薰風意。
爲補臨池竹數行。

牀頭葯裹半拋殘。篋裏吳鉤謾拭看。多謝故人容我懶。

送迎長是不衣冠

一束詞箋手自刪酒痕粉印滿行間而今剩有紅牙譜

吹笛臨風憶小蠻

時方自輯倚笙小譜

太行山翠入詩多遲客相過話薜蘿一種懷州好風景

紅薔薇放近如何

懷州學使解中紅薔薇一本花時爛漫可愛鹿柴自懷來見示途中記事

新詩作此訊之

酬贈曉岑

一戰驅豺虎功成尙練師聞雞函谷月出塞杜陵詩壯志看蓬鬢離情悵柳絲數奇知不怨荷戟小臣宜

歸旆瞻何日商南燧又傳當關民倚重超距士爭先雲

氣開秦嶺軍聲接漢川從戎多俊傑莫讓祖生鞭

病起雜述

久閉思暫出薄幃上朝曛中庭兩槐樹相見如故人雨過蘚痕長秋近蟬聲新披襟坐階側淡寂天爲鄰客來言九遠積潦淹車輪本無遠行念置之若罔聞

刀匕問越人溫涼試有素見其色踟躕轉復心顧慮浮生寄大化修短類遵路決疣數難辭履冰險可懼豈無曠達懷適意事多誤蟲臂及鼠肝物理此焉寓

治疾如禦戎心一力乃并慎疾如濬川源淪流乃清閉門及一月攻取目不經暇或發縑囊倦卽陳桃笙力弱

無勞形思斂無搖精終身嬰微疴可以當養生

次韻癩仙鬪蟻

物類各有求攻取積寒暑枝哉此元駒師出若風雨成
列半在階據險或緣礎中亦有勇者固壘恥穿土須臾
敵衆來意態雄且武附羶本同志旋磨忽分部勝負未
可必陣合搏如虎司馬肅三軍誅殺首失伍微蟲爾何
知義不惜頰距橫屍吁可傷勦力志良苦勾踐式怒鼉
士氣一朝鼓況此殞紛紛蹟類錡殉魯我欲覆杯水坳
堂限淮汝俾令解鬪歸選徒日諷午浪戰非善謀微幸
啗賭墅

卽席有贈

一夜蘭釭話徹明醉中意態病中情春風三載無消息
腸斷疎簾倚玉笙

殘雪樊樓柳未勻南來梅蘂恰先春尋芳悔煞名盈耳
不信添蘇是舊人

入懷明月未成歡況是行雲隔座看多事烏龍偏拒客
小庭吠影碧梧寒

促別香街駐鈿車花前容易日西斜舊游記得相尋處
阮曲東南第五家

牽牛花

銀漢斜傾夜漏殘
貪看碧玉起凭欄
薄承清露舒嬌易
漸上朝陽駐艷難
滴翠東籬歛酒盞
染紅南國釘春盤
雲藍小袖盈筐處
人憶西風怯曉寒

重九日雨不得登吹臺有懷陶澹山黃赤城陶晴

臯崔雪堂林曉岑同鹿柴作

登臨相約幾昏朝
對菊誰教興寂寥
野色共憐郊外劇
秋光莫向雨中消
乍寒古澤迷征鴈
小霽平林掣阜鵬
採得白蘋思寄遠
江湖無奈水迢迢

重陽後三日同人邀登吹臺以襄陽我輩復登臨

句爲韻分得臨字

古臺落木秋森森
撫檻能動飛揚心
重陽前後兩日雨
蘚徑滌盡塵埃侵
西風催我補登眺
南薰門外天陰陰
籃輿行止意不適
呼僮攜屐遵平林
道過菊圃意欣賞
肯賣何惜雙南金
汴河故道水潦積
木棉葉密波浸淫
十年作客遇多阻
濡足寧復憂自今
隄迴樹盡斷塔出
臺址相距無百尋
何年七級剷過半
令人氣鬱愁難任
登臺拾級寒漸峭
棖題烏革憐嶽岑
梁唐詞賦各千載
敦槃繼跡誰豪吟
無人到處雲宿牖
平日疑有飛仙臨
河汝嵩少望紆鬱
疎鐘欲斷炊烟沈
鴻飛冥冥倦息下
響遞暮角悲櫛椽
凌虛絕頂許露宿
舉手直擬捫井參

下方秋色盛蘅茝朋儕乞種爭擷襟一枝手折獻古佛
空谷聊證蹙然音褊衫老僧走相送後期預訂霜華深
兔肥草淺瀕埽榻看余決拾來從禽

移居無量菴北卽事奉簡諸友人

漸與囂塵隔空庭及餞秋却憐先至客不爲菊花留貫
酒添新夢編籬感舊游往來隨泛梗吾道本閒鷗

獨客無家具琴書併一囊馱來煩蹇衛堆去滿匡牀蔓
惡除宜盡門閒杜不妨懷中刺漫滅未信禰生狂

阿咸邀我去鬪奕遣蕭辰謂家却囑應門僕湏留不速

賓索漿憐道遠看劍定情親窗外三竿竹逢迎勝主人

地僻無宵禁霜華踏不難柝聲聽轉遠夜色望何寬苑

廢青燐出池荒野鶩寒諸君愛秋水輸我月中看新居與明

周藩廢邸僅隔一街其地爲土人發掘遺物多成巨坑
秋雨旣降積潦方四五里月下小步荒寂淪漣殊忘在
城市也

盧氏山中產菌大如盤有毛土人名爲猴頭食之

味甚美用少陵閩鄉姜七少府設鱸韻作歌

地爐榾柮燒嚴冬石鼎騰沸橐鼓風繩穿筐貯菌磊磊
俘馘誰入狙王宮廚丁伐毛洗塵土血漬疑染瓷甌紅
登俎品可壓蓴苈配物性不宜薑葱老樹臥沙綠苔擁
拄杖撥得由山翁燂湯小啜香滿頰再索惟恐寒巖空

客中盤飧紛怨德坐對珍蔬興何極此物烟霞產亦偶
豈必買山怨無力我昔結茆狎猿鹿溪毛一一會物色
朝來放筴雪欲霏鋤筍雲門最相憶

心菴寄鷗閒舫中植花藥幾徧余於清明前一日

冒雨往觀癯仙繼至心菴卽事有作次韻酬之
竹架茆籬宛轉通閒鷗寄在蔡河東卽看花漑將千種
恨不園開更十弓磴石翠移郊外雨鉤簾香綴夜來風
經營一一關詩意未許朋儕句鬪工

五嶽何年了夙因花前惆悵踏歌頻春三分去天如夢
日一迴來君亦賓相對清蹤憐水竹無多同調總風塵

雨絲颭颭門爭叩應有游人學墊巾

次韻酬鄭青墅明府

社啟敦槃舊朋來戎馬餘治春驚雨雪卜夜藉琴書骨
傲才難盡權輕志易虛停杯聽談往遺憾失鯨魚

次韻再酬青墅明府

客館驚春去閒庭小坐餘鶯聲催貰酒花影伴鈔書綺
語緣愁減幽懷爲病虛龍門路迢遞敢鄙暴腮魚

宿疴未痊
不赴秋試

昨捧瑤編返燈挑夜雨餘劇憐征戍什半似治安書同
調吾何敢憂時爾不虛浪游還自笑辛苦祇蟲魚

渡穎

弄暄微雨歇春滿野橋前新水潔如此孤鳧飛可憐渚
花紅渡馬汀葦綠藏船洗耳人難再臨流意惘然

汝州試署卽事

裁量鈿尺判純疵花樣新翻爭下機棄婦自慚蘿補屋
何曾眞識五銖衣

薦棘圍牆曉色催唱名前院尙門開琴樽寂寞青衫冷
也算風簷一度來

試卷催交聲漸譁髻齡風景渺天涯三條燭剪凝香寢
猶記親擎利市花

芹藻爭先泮水儲春風聲價滿行廚他時眞味鹽梅辨

應悔嘗羹倩小姑

贈蔡懋
堂刺史

書蔡刺史宛南防寇詩卷後

望嵩樓頭烏夜啼天河西壓櫓槍低汝州刺史被酒出
素卷白云前在南陽時北門司鑰有微績青衿相率成
歌詩績亦無足紀詩亦無足錄迴憶被檄初統兵妖氛
正滿渚河曲此時惟懼官守失一身萬死安足贖其後
移營丹浙間荒山風雨披榛菅礮聲震耳夜不寐自起
爇火懸林端聲勢虛張賊疑懼桑麻一方幸安全吁嗟
乎豫中籌兵今五年民馬蹶蹄車折轅晨昏奔走力不

繼事機坐失嗟從前刺史今緡汝州印州南魯陽關險
峻太歲在巳月在辰楚帥蹙賊賊潰奔張燕但思避網
罟徵側豈解窺川原連峰插天青不絕虎嘯一聲隊驚
失當時若塞一丸泥何至秦中野流血我來歇馬城東
郊相遇野叟傾村醪爲言中丞昔過此通侯意氣冠羣
僚賊來不知去不識惟聞待死日淬鞞中刀楚北貔貅
戰未已刺史勤慎湏更矢卷中詩句雖未工奉職得民
始諸此瘡痍惜閭閻甘苦同吏士大帥人人挾此心宵
旰何煩 聖天子昨聞羽檄來軍中防江春水增洶洶
舳艫有岸不得泊牟麥可慶春收豐悲笳欲斷哭聲起

隔江喚渡多哀鴻賊情詭詐固難測以隣爲壑將安窮
還君詩卷長太息天下寧無文潞公

風穴山白雲寺

林霽聞午鐘隔溪聲不絕崖柏俯偃僂山靈遣迎客金
碧輝天半磴仄路新闢僧房承鳥巢高下以次列徑轉
過石梁圍牆勢突兀亭俯水一泓清足鑑毛髮題名滿
竹際竹大痕半裂往來羨樵牧忘情無今昔西上崖漸
陡琤琮亂泉脈埽地支茶具枯枝刷雲隙有客指前峰
青峭立百尺景物幽可探其下卽風穴惟靈鼓萬物生
殺運無跡燦忽盛土囊端倪豈容洩恐致造化嗔深入

戒游屐

邠縣道中弔雁門司馬

謗書盈篋促行師太息西歸不復期
組練未嚴新士卒鼠狐還懾舊旌旗
堅城再克謀何壯殘局孤撐勢莫支
風雨二嶠靈爽在驚心定憾餉車遲

將至大梁戲吟四十字先寄心菴

先春車未戒茗飲日君家忽見雲中塔
遙憐檻畔花晚香思小對清興謾先誇
長劍崆峒倚看余兩袖霞

大梁試署卽事同鄧明府信齋董孝廉鶴峯周秀

才穆門作用韻

多病年年夏課遲槐黃虛說正當時
三更獨對天涯月一劫偏尋局外棋
好句屢聞傳隔院狂蹤未擬訴新知
諸君若有南皮約願乞千壺灌漏卮

次韻酬周四穆門見贈卽送其歸里秋試

春信江南北游仙話早年長筵花沃若
芳草騎翩然風雪催雙鬢功名悞一羶
平生豪興在笙鶴尙能憐泉以狂難飲
溪因愚得名相期狎鷗鷺詎屑揖公卿
孤劍天涯倚涼颺驛路生菱花香繞楫
羨爾賦南征縹緲十三樓歌聲夜不休
舊游梁燕盡短夢夜烏愁題壁詩難覓
采蕪船易留湖光近何似芳訊盼深秋

鄭州道中却寄春亭心菴

菽麥花開香滿陂無邊野色暝鐘時清溪水落閒魚笱
古戍烟疎出酒旗待月襟懷孤館暢添衣心事小童知
圃田麋鹿紛相逐欲獻何由射麗龜

古虎牢關

禹跡茫茫幻不已關外平原一千里造化蓄怒欲作山
石孕未成土忽起桑麻相壓青入雲修途一綫裂無底
汜水以西勢更遒峭壁直上猿猱愁左旋右旋至螺頂
偃仄幾不容轅軸巨靈有掌力難擘忽然紅日懸當頭
溝塍廬井列高下可屯十萬雄貔貅嵩山南峙河北繞

天教控扼東諸侯西風蕭蕭沙淅淅欲下嚴關穴重入
圓石轉墜千仞崖僕夫驚窺客股栗車牛曳尾慘不前
雙趾一失悔何及我聞建元泰始同車書洛師相繼稱
京都長戈利矛東設守年年計吏勞合符後來太阿一
倒執羣盜進退猶坦途豈惟此關成坦途峭函劍閣人
爭踰成城衆志侮可禦流傳簡冊言非誣繭絲保障幸
勿負百年絕頂農人居

洛水懷古

煮豆然萁事若何椒塗郁烈客初過于田叔段猜嫌積
求女三閭怨慕多異日詩還投白馬當時國已去東阿

不知翠羽明珠畔川后何年爲靜波

邙山

雲臺人去漢廷空典午朝臣傀儡同千載北邙好松檟
不應埋骨少英雄

送錢生游維揚

并序

生名復初字石帆孫文靖公同邑人也慷慨有
智畧嘗從文靖征安南當黎維祺初復國阮惠
退據古占城地山路千里車不得方軌計無所
出生請於文靖曰道險如此雖幸得進勞大兵
多矣且黎氏尙不能撫有其國不如假某羽旄

往諭阮惠卽割占城故壤與之而責之以甥舅
之義俾相親睦阮惠懾兵威久今得封喜出意
外必聽命文靖不能用富良江之敗文靖率殘
卒先行 御賜物總督印皆在生處生以大義
曉二裨將矢共保護時烟埃漲天矢石亂墜襟
袖出營數十武失足陷積屍中方手麾裨將去
適有潰馬至乃力援其尾而出然同行無一人
矣營故近江岸岸百尺非常渡處雖匍匐不能
下追者急手刃十四人始得渡文靖旣出險義
不入鎮南關生與諸將謀裂旗幟爲暖幄給使

乘而於月黑時昇以入方駐師江岸時有某觀
察以饋糧失期當斬生救以奇計旣免乃私白
文靖文靖震怒生曰賊游奕四出某之失正坐
過於謹慎耳告公而公免之則軍法不得伸不
免則失一有用才公視軍中誰可代某職者文
靖意始解安南初定同諸將上功授七品職及
敗信聞文靖卽內召生名不得錄乃走依其戚
於豫歲庚申余識之於王菴圃明府處道請封
阮惠本謀甚詳盡適將謁當事者於維揚索詩
贈行爲賦轉韻六十句

黃河水接長淮路白浪如山橫古渡壑中腥沫正騰蛟
隄上迴飈狂折樹舉觴留客客不留揮手忽忽挂帆去
淮南自古多英傑客膽如斯應有遇客言犯險非偶然
憶昔從軍徼外天馬蹄炎氛秋七月人過銅柱路三千
花香徧斫森森桂霧毒驚看跼跼主將裹糧愁道險
孱王奉綬乞都遷出奇難學甘延壽排難思爲魯仲連
誰知運迫蟲沙劫雲似壞山營上壓折戟沈沙旆裂風
在手虎符思返納喧闐銅角象盈山計授健兒盟共敵
距躍無能仗的盧富良江岸如三峽生恨未梟逆虜頭
佩刀且喜新離匣浮橋斷處浪拍天十四蠻酋來雜沓

孤雛腐鼠何足誅爲示天兵戰不乏此時主將正北奔
春山百疊慘征雲久聞絕脰眞消息白晝相逢誤鬼神
我亦自疑身健在不知何術陣橫翻十載南交封赤社
屢看翡翠郵亭下可惜當時窮島中不曾親蹠皇華馬
不然軍府議殊功豈讓唐蒙與陸賈勸君失職且弗嗟
壯游如此誰能加男兒殺賊幸不死掉首便可尋烟霞
西湖一角足欣賞夜聽吠蛤晨撈鰕維揚城郭雄江甸
樂安兩載曾傳箭樂公社散冷螢飛召伯棠枯啼鳥怨
舊客攜筇至蜀岡饒歌空話軍中讌風雨蕭疎孤館寒
刀瘢左右閒捫徧座客如無博望侯休袒貂裘教謾看

九月十三夜菊花下作

秋窗無俗夢獨寐意悠哉忽憶菊將放起憐月早來清
樽尋隔院寒影倚疎苔遙識荒園內今年又未栽

洛陽道中雪

多病需藥物言赴洛市會山行途未半風緊雪漸大初
作珠浙漉繼拋玉瑣碎羣憐失狐兔青尙認松檜孤客
感易生况此哀壑內登高望灑澗寒色上襟帶道逢垂
釣翁蓑笠一二輩市遠酒已沽筐虛魚乍賣天晚沙礫
滑挈侶將焉邁翁笑指前溪家在炊烟外

龍門廣化寺

大川流崩騰小泉噴轟聳水雲盪無盡幻此招提跡虛
空見神鬼高下列千百薜蘿捫在今斧鑿感自昔峭壁
束廊宇茶話境幽仄坐與嵐氣爭嘯畏龍湫逼高閣面
西南隔河招山色維時當冬仲冰雪亂崖石飛檻凌孔
道車牛過朝夕俯憫行者勞不知身在客

日晚不及至香山寺賦寄寺僧

北朝香火寺僂指劫灰多勝地餘金碧幽巖足薜蘿鐘
魚聽已近烟水悵如何辛苦勞懸榻春風擬再過

劍南室校刻

